

NY FOTOAN' NY FIKAMBANANA

SY NY FAMANTARANA

 Manao ahoana. Tombontsoa ny tonga eto izao hariva izao, sy ny mitsangana eto amin'ity toerana ity.

² Izaho, aninkeo maraina, dia nandeha teny an-dàlana... Nivoaka aho mba hivavaka, niandry ny Tompo. Ary teo am-pandehanana teny an-dàlana, dia nalefako ny—ny radio an'ny mpitoriteny iray, Rahalahy Smith, ilay rahalahy mainty hoditra, (nandre azy ve ianareo rehetra aninkeo maraina? Ny sasany taminareo?) tany, mino aho fa Ohio ilay izy. Olona anankiray no niteny tamiko mikasika azy izay nitory teny, ka nanao hoe, “Tokony nihaino azy ianao, tahaka an’izany.”

³ Sambany aho mba nandre azy, aninkeo maraina. Ary tena niteny marina tokoa izy mikasika ny hoe toy ny ahoana ny fahatondrahan’ilay ota eto amin’izao tontolo izao amin’izao andro izao, ary izy dia... Ary namadika lavidavitra kely aho, onjam-peo iray avy teo, ary tonga teo ka nandre anankiray hafa. Tamin’ny fotoana nahatongavako teto, dia efa vonona ny hijery aho raha toa ka tsy efa tara loatra ny nahatongavana teto ampiangonana, aninkeo maraina rehefa niditra aho. Noho izany, dia tena nahazo tombontsoa tokoa isika ny ho tonga eto izao hariva izao, ary hanompo ao amin’ny Tompo.

⁴ Ary miresaka ny amin-dRahalahy Neville, sy ny hafatra tamin’ny indray andro, ho an'ilay ramatoa kely, ny anabavintsika izay vao avy nesorina tamintsika. Izany dia, isika rehetra dia mahafantatra hoe iza izany, izany dia Ranabavy Weaver. Ary mieritreritra ny lehilahy iray eto, izay natao batisa izao hariva izao; izy... Izaho no nanao batisa azy tao anatin’io dobo io rehefa izaho... tsy maintsy nitondra azy teto tao amin’ny sezamisy kodiarana iray izy ireo. Teo am-pahafatesana izy, niaraka tamin’ny homamiadana, ary io alina io ihany sisa no nananany mba hahavelomany; nandao azy ireo dokotera, tsy maintsy ho faty izy ny ampitso maraina. Ary nandeha tany an-tranony aho ka niezaka niresaka taminy mikasika ny fanasitranana avy amin’Andriamanitra, ary nanohy namerina fotsiny izy hoe, “Tsy mendrika aho ny hidiranao eo ambanin’ny tafo-tranoko.” Hoy izy hoe, “Izaho—izaho dia tsy mendrika ny hidiran’ny mpitoriteny iray ao an-tranoko.” Hoy izy hoe, “Mpanota aho.” Saingy hoy izy hoe, “Tompoko, tsy te-ho faty tahaka an’izao aho.” Ary noho izany dia i Grace Weber, eto, no nitondra ahy tany. Vao tonga aho, reraka avy tany amin’ireo favoriana; ary rehefa nivavaka ho azy aho tany, ka namaky ny

Soratra taminy, dia voavonjy izy. Tamin'izay fotoana izay, dia zara izy raha afaka nampiakatra ny tànany, saingy te-handray tànana ny olona rehetra izy. Izy fotsiny . . . nisy zavatra nitranga taminy.

⁵ Ary raha mbola nandray tànana izy, dia nahita fahitana iray aho mikasika azy nandeha tany amin'ny tranon'akoho, dia niverina. Hoy aho hoe, "Eny àry, ho tsara izany ankehitriny"; ary valo ambin'ny folo taona lasa izany. Ary naharesy mihitsy an'ilay homamiadana izy, hatramin'izay. Raha maty izy, . . . Tsy maty niaraka tamin'ny homamiadana mihitsy izy, tratry ny aretim-po tampoka izy ka namono azy. Nataon'izy ireo teo ambanin'ny rivotra izy; maty tao anatin'ny aretim-po tampoka izy.

⁶ Ary noho izany dia nieritreritra aho, tamin'ny farany mihitsy rehefa nivoaka ny olona, ka izy ireo nihira hoe, *Nony Tonga Jesosy*. Izany tanteraka tokoa no nitranga, tonga Izy ka nitahiry ny ainy nandritr'ireo valo ambin'ny folo taona ireo. Ary nieritreritra aho hoe, mety toy ny ahoana. Io vehivavy io angamba dia mety tsy nahafantatra fa nanao an'ilay izy tahaka an'izany izy. Avy eo, indray koa, mety mahafantatra izy. Saingy fotsiny hoe nety toy ny ahoana ny nahazoana an'io ampahany io teo, *Nony Tonga Jesosy*.

⁷ Ankehitriny taloha kely fotsiny izany, izaho—izaho dia manantena, an'ny favoriako lehibe maromaro. Lasa tena sorena aho. Aninkeo maraina, tena nihodinkodina mihitsy aho, nandeha aho mba—mba hivavaka. Ary izaho—izaho dia tao an-trano, tafaverina eto. Ny fianakaviana, vao avy nitondra azy ireo nankany Arizona aho, ary izaho dia . . . mba hahafahan'ireo ankizy miditra an-tsekolyl. Ary miverina eto fotsiny aho mba—mba haka aina kely, handeha hihaza miaraka amin-dRahalahy Wood sy ny andiana rahalahy eto; mba handeha hihaza, amin'io herinandro ho avy io. Handeha any Kentucky izahay. Ary izaho dia . . . efa tany . . . Ary tonga tampoka fotsiny aho tamin'ny andro izay—izay nahafatesan-dRtoa. Weaver, ary tsara mihitsy ny nahatongavako eto ka hanampy an-dRahalahy Neville amin'io fandevenana io.

⁸ Ary izaho tsy miezaka ny . . . Izaho tsy miezaka ny—ny hiteny betsaka loatra ny amin'izany, fantatrareo, manodidina an'ireo olona izay mitaraina. Satria, heveriko fa, ny anankiray amin'ireo zavatra ratsy indrindra dia ny mahita ny—ny lehilahy iray na vehivavy iray izay mitaraina tsy an-kitsahatra. Nieritreritra foana aho hoe, "Andriamanitra, sakano amin'izany aho." Hitanareo, izany—izany foana no mampahalemy ny finoana, fantatrareo. Ianareo fotsiny—ianareo fotsiny . . . raha ianareo—raha ianareo . . . Fantatro fa rehefa miha-antitra ianareo, ny tsirairay avy amintsika, dia hanana zavatra nitranga isika ary misy zavatra nitranga. Ary fantattro fa ireny zavatra kely ireny dia mitohy miangona, izany ilay izy rehefa miha-antitra ianareo, toy izany fotsiny izy ireny. Fa heveriko fa ny zavatra

ratsy indrindra, dia rehefa i Satana manisy satroboninahitra eo amin'ny fiainan'olona anankiray: lehilahy antitra iray na vehivavy antitra iray be taraina, hitanareo. Izaho—izaho dia manantena fa tsy ho tonga eo amin'izany toerana izany aho. Antenaiko fa ho vitako ny hizaka an'izany, ireo entamavesatroy, ary—ary tonga eo amin'ny toerana iray izay... Tiako ho voaisy satroboninahitry ny Voninahitr'Andriamanitra ny fiainako: ny Fiaretany, famoram-panahiny, fiadanany, fahalemem-panahiny, ary feno ny Fanahy Masina.

⁹ Ary izaho...ny anankiray amin'ireo zavatro lehibe izay mankarary ahy foana nandritry ny fiainako, dia ny aretin'ny fahasorenana. Izany dia rehefa izaho tena reraka, amin'izay fotoana izay aho dia tena trotraka. Izaho dia lasa...karazan'ny mahatsapa toy ny hoe tsy misy olona miraharaha anareo, fantatrareo, ary—ary ianareo rehetra dia... Ianareo dia tratrañ'izany, ihany koa. Ary vao avy nahazo ny tena fatra mihoatra an'izany aho, fantatrareo, ary tena mankarary izany indraindray, ary zara aho raha... Ny fanerena izany, ary izany no manao an'io. Ary izaho dia tonga eo amin'ny toerana iray izay matetika, indrindra fa miaraka amin'ireo fahitana betsaka ireo, hitanareo, izany fotsiny no mahazo ahy. Mijery olona anankiray aho, mieritreritra aho hoe, "Fahitana iray io. Tsia, tsia, tsia, tsy izy izany. Eny! Tsy izany ve io?" Hitanareo? Ary tsy fantatrareo fotsiny hoe inona no vidiny iray miaraka amin'izany. Noho izany—noho izany ianareo—ianareo dia manontany tena. Avy eo ianareo dia lasa mieritreritra hoe, "Eny, ianareo dia..." Avy eo dia miala etsy amin'ny ilanareo ianareo ka manao hoe, "Eny, ankehitriny, inona—inona no nataoko? Inty aho, izaho—izaho dia dimampolo taona ary tsy nahavita na inona na inona ho an'ny Tompo aho; ary izaho—izaho miha-antitra. Ary inona no...? Oh, oadray." Amin'izay fotoana izay ianareo dia tratrañ'ny...ilay nantsointsika fahiny hoe "eritreri-dratsy." Ny sasany aminareo rahalahy izay saiky mitovy taona amiko dia mahatsiaro an'ilay antsoin'izy ireo fahiny hoe "manana eritreri-dratsy." Zatra niteny mikasika an'izany i Papa ary nanontany tena aho hoe inona no tiany nolazaina, ary azoko antoka fa fantattro ankehitriny izay tiany nolazaina. Noho izany, dia trathy ny fihetseham-po tahaka an'izany ianareo, nefo tsy misy anankiray marina izany; ianareo fotsiny ilay izy, fantatrareo izany. Hitanareo, fantatrareo izany, ianareo fotsiny no manao an'izany.

¹⁰ Noho izany dia niezaka aho ny mampitony kely ny tenako ankehitriny, ary miomana ho an'ilay—ilay tosika lehibe izay antenaiko fa ho avy tsy ho ela. Ary avy eo amin'ny...Tsy maintsy mandeha any New York avy hatrany aho, ary izaho... ho an'ny fivoriana iray any, asam-pitoriana iray. Ary avy eo dia any Shreveport, avy eo dia miverina any Phoenix. Ary avy eo mandalo any andrefana...ny sisin-tany atsimon'i Etazonia.

Ary avy eo dia eo am-panaovana ny fandaminana ny any am-pitan-dranomasina izy ireo ankehitriny, mba hanombohana haingana arak'izay azonay hatao aorian'ny voalohan'ny taona, angamba amin'ny Marsa, Aprily, zavatra tahaka an'izany; izay hanombohanareo any Stockholm na Oslo, ary handeha manodidina an'izao tontolo izao, raha vitanay amin'ny dia manaraka.

¹¹ Ary ankehitriny dia ao an-trano aho, miala sasatra kely, mamerina kely ny tenako ary maka aina kely. Ary raha sitraky ny Tompo, dia hiverina aho amin'ny Alahady heriny, avy any Kentucky. Ary—ary raha mety ny zavatra rehetra, mahafaly ny Tompo, ary raha tsy mampandinona an-dRahalahy Neville; eny, dia hiezaka fotsiny aho ny handray ny fotoana amin'ny Alahady heriny, raha—raha sitraky ny Tompo. Ary raha manaiky fotsiny Izzy tahaka ny haneken-dRahalahy Neville, izaho—izaho dia ho eto. Eny tompoko, Izzy dia tena... raha manaiky ny amin'izany Izzy tahaka an-dRahalahy Neville. Antenaiko fa manaiky Izzy. Ankehitriny, hitanareo, avy eo dia fantatro fa tsy ho ela aho dia, raha sitraky ny Tompo, handeha hiala aminareo vetivety fotsiny aho.

¹² Ary izaho... hafatra kely fotsiny, raha maka zavatra kely ato am-poko aho, noho izany aho—aho—aho dia mahatsapa fa te-haneho an'izany aminareo, hitanareo, ary afaka miombona manodidina an'izany isika. Ankehitriny, dia manana vitsivitsy amin'izy ireo aho, dimy na enina izay tonga tamiko fotsiny andro vitsivitsy farany teo. Ary nandeha aho, andro vitsy teto, nihaza vontsira teto. Ary mandeha any anaty ala aho, ary maka pensily iray sy taratasy. Hitanareo? Ankehitriny rehefa saiky nanomboka tsara ny andro sy misandratr'andro, dia miankina amin'ny hazo iray any ho any aho. Raha tsy mandeha matory aho, dia manomboka mivavaka, ary amin'izay fotoana izay aho, dia hanome ahy zavatra anankiray ny Tompo, manomboka manoratra naoty kely an'izany aho, hitanareo. Fantatrareo izay tiako lazaina; rehefa tafaverina amin'ny tenanareo ianareo, ary amin'izay fotoana izay ianareo... Avy eo tonga eto aho, manoratra azy rehetra eo amin'ny takelan-taratasy iray. Ary amin'izay fotoana izay rehefa antsoina aho, dia mihazakazaka aho ka maka ny takelan-taratasiiko ary mijery an'izany ka mahita an'izay azoko hanombohana, hitanareo. Vao avy nitranga mihtisy izany ankehitriny.

¹³ Noho izany ankehitriny, izaho dia maniry ny, raha sitraky ny Tompo, ny hiresaka fotsiny... Hiezaka aho ny hanao... hanafohy an'ireo hafatra lehibe, lava ireto, hitanareo; izay haka ora maro aminareo. Ary ny Tompo no nanampy ahy hanao asa tena fohy ho an'izany tany Chicago, omaly hariva tany, teo amin'ny telopolo minitra teo. Ary nisy olona iray tonga teo, nanao hoe, "Tsy nieritreritra aho fa tao anatinao ilay izy, saingy nataonao izany!" Noho izany telopolo minitra, raha

tokony ho ora roa sy sasany, na telo, fantatrareo. Noho izany angamba afaka mandeha haingana aho izao hariva izao ary hahazo fahazarana kely iray, tsy hihazona anareo ela loatra.

¹⁴ Andriamanitra hitahy anareo. Tsy mampaninona na aiza na aiza alehako, tsy hisy mihitsy toerana iray tahaka an'ity tabernakla eto ity. Ity no trano, trano mamy. Ary miaraka ory amin'ny fianakaviana Weaver aho. Ary ilay rahalahy sarobidy mainty hoditra izay maty, dia efa nivavaka niarakana taminy aho taloha kelin'ny nahalasanany, ary olona mahafinaritra iray. Ary any an-Trano miaraka amin'Andriamanitra izy ankehitriny, ary tapitra ny rehetra. Ary ianareo dia tsy maintsy handeha na ahoana na ahoana, ary fantatsika rehetra izany. Noho izany isika dia...enga anie ny Tompo hampitsahatra ny fanahiny ao amin'ny fiadanana, ary indray andro any dia manantena ny hikambana ao amin'ny Tany iray any isika, izay tsy misy aretina, alahelo, na fahafatesana. Mandra-pahatongan'izany, dia ndao isika hanao ny zavatra rehetra izay azontsika atao ho an'ny Filazantsara.

¹⁵ Miresaka ny amin'ny fanerena, dia nivavaka ho an'izany aho aninkeo maraina. Inona no hataonareo raha tsy nanana fanerena ianareo? Eritrereto fotsiny izany. Ny fanerena dia ampanhan'ny fiainana. Nampahery kely ahy izany rehefa nieritreritra an'izany aho. Raha tsy nanana fanerena ianareo, dia ho tahaka ny saribakoly vorodamba iray ianareo, tsy hanana fihetseham-po ianareo. Tsy hisy na inona na inona azonareo hatao. Tahaka ny vady lahy sy ny vady vavy, angamba raha te-hanao zavatra iray izy, ka miezaka miara-miasa izy ireo (indrindra ny Kristiana), ka ilay iray hafa dia tia... Ary amin'izay fotoana izay rehefa miaraka ianareo mba...hitanareo izay nataony; izy dia mahita...Hitanareo, ilay fanerena dia tena manao anareo hiaraka akaikikaika kokoa. Ary misy olona miteny aminareo hoe "Eny," hoy izy, "erittrereto fotsiny ilay vady vavy kely izay nandalo teo amin'ny fanerena maro be rehefa tsy dia tsara loatra ianareo, na ilay vady lahy kely izay nandalo teo amin'ny fanerena iray rehefa tsy dia tsara loatra ianareo. Avy eo rehefa voavela ny zavatra rehetra, dia jereo hoe toy ny ahoana ny tsapanareo mikasika azy. Oadray, ianareo fotsiny... Hitanareo, tsy maintsy manana fanerena ianareo. Izay ihany.

¹⁶ Ary erittrereto fotsiny, ny amin'ireo fihetseham-po, ahoana moa raha tsy nanana fihetseham-po mihitsy ianareo, na fanaintainana na inona na inona? Ahoana moa raha tsy misy fanaintainana mihitsy tokoa? Tsy hanana fihetseham-po mihitsy tokoa ianareo. Hitanareo? Ary raha tsy nanana fihetseham-po ianareo, amin'izay fotoana izay dia lasa ny anankiray tamin'ireo taovam-panamboloanareo. Hitanareo? Noho izany, hitanareo, ny zavatra rehetra dia milamina mihitsy na ahoana na ahoana. Noho izany, "Andriamanitra, omeo anay fotsiny ny fahasoavana hahatanty an'izany," izay ilay zavatra. Raha mitsangana fotsiny

miaraka amin'izany fahasoavana izany isika, ka mitsangana eo ary manao hoe, "Fantatsika fa rehefa tapitra ity fiainana ity, dia misy anankiray lehibe any amin'ilay ilany hafa izay andrasantsika handehanana." Ary ankehitriny, isika—isika dia mahatsiaro fa ireo zavatra rehetra ireo, dia fanerena iray izany.

¹⁷ Izany, ny olona sasany dia miezaka mampiditra ny Kristianisma, hoe "ianareo dia afaka amin'ny ahiahy. Ianareo dia..." Tsia, tsy afaka ianareo. "Afaka amin'ny fanerena ianareo." Oh, tsia! Manampy fanerena ianareo rehefa lasa Kristiana iray ianareo, satria ianareo dia karazan'ny mpanao tsirambina iray—mandeha, tsy miraika, na inona na inona misy eo, tsy miraharaha an'izay nataonareo.

¹⁸ Fa rehefa lasa tena Kristiana iray ianareo, amin'ny fotoana rehetra dia manontany tena ianareo hoe, "Mahafaly ny Tompo ve aho? Raha mba afaka mandre avy Aminy aho!" Mametraka anareo ao amin'ny fanerena iray izany, manao anareo hiambina izany. Izany no manao anareo amin'izay maha-izy anareo. Koa na izany aza, ny fanerena dia fitahiana iray. Miankina amin'ny fomba ijerenareo azy fotsiny ilay izy. Miankina amin'ny fomba ijerenareo azy fotsiny ilay izy. Hitanareo? Raha mijery an'ilay lafiny hafa fotsiny ianareo, dia misy—dia misy... Tsy mampaninona na mahia toy ny inona aza ilay zavatra tapahinareo, dia mbola manana an'ireo lafiny roa an'izany foana ianareo, hitanareo. Noho izany isika dia te-hahita an'ireo lafiny roa.

¹⁹ Noho izany ny fanerena... Mieritreritra aho hoe, "Oh oadray, izany dia... Inona ity fanerena ity? Raha mba afaka nateraka tsy misy an'io fanerena io aho." Eny, raha tsy nanana an'io fanerena io aho, dia tsy ho toy izao maha-izy ahy izao aho. Tsy ho Kristiana iray aho, angamba. Io fanerena io no nitarika ahy teo amin'i Jesosy Kristy. Hitanareo? Noho izany, dia zavapitahiana iray izany ho ahy.

²⁰ Noho izany araka ny nolazain'i Paoly, na dia fony nanana fanerena iray aza izy na zavatra anankiray na hafa, dia nitady ny Tompo izy mba—mba hanaisotra an'izany aminy intelo. Fa hoy ny Tompo hoe, "Saoly, Ny... Paoly, ampy anao ny Fahasoavako."

²¹ Hoy izy hoe, "Noho izany, dia hirehareha amin'ny fahalemeko aho. Amin'izay fotoana izay rehefa malemy aho, dia mahery aho." Hitanareo? Raha mbola araka ny sitrapon'Andriamanitra foana ilay izy, dia mety tsara.

²² Ankehitriny, nitady Azy aho indray mandeha rehefa nanelingelina ahy mafy izany, nampitahotra ahy izany. Ary nilaza tamiko Izy, teo amin'ny valo na folo taona lasa teo, hoy Izy hoe, "Tsy hampitahotra anao intsony indray izany." Ary tsy nanao an'izany intsony ilay izy. Tsia, tompoko; aza—aza manahy ny amin'izany. Tsapako fotsiny ilay izy, saingy fantatroy fa eo izany; fa manohy fotsiny aho satria tsy mampitahotra ahy

intsony izany, noho izany dia tena mankasitraka an'izany aho. Ankehitriny, afaka nilaza Izy hoe, "Tsy hisy intsony izany," tena tahaka ny hoe "Tsy hatahotra intsony ianareo."

²³ Noho izany dia ny Sitrapony no mitranga, koa dia manaiky an'ilay izy fotsiny aho ary manao hoe, "Misaotra Anao, Tompo, handeha tahaka an'izany aho."

²⁴ Ankehitriny, ndao isika hanondrika ny lohantsika vetivety fotsiny ho—ho an'ny vavaka. Misy fangatahana manokana ve ho an'ny vavaka? (Mahita aho fa misy mosara mipetraka eto.) Atsangano ny tānanareo. Tompo, tahio ny tsirairay avy amin'ireo Zanakao.

²⁵ Rainay An-danitra, raha manatona ny Seza fiandrianan'ny Fahasoavanao lehibe, mendri-kaja izahay ankehitriny, satria nangatahana mba ho tonga izahay. Tonga nohon'ny fanasan'i Jesosy Kristy izahay. Ary tonga miaraka amin'ny fanahianay rehetra izahay, ary apetrakay eo Aminy izany satria Izy no miahy anay. Fiononana lehibe toy ny ahoana izany, ny mahafantatra fa Izy no miahy anay. Ilay Andriamaniry ny Lanitra lehibe, ilay Mpamorona; miahy anay, ny Famoronany. Tena faly izahay noho izany, Tompo. Fiononana toy ny ahoana izany ho an'ireto fotoana izay iainanay ireto, rehefa toy ny hoe tsy afaka ny—tsy afaka ny hahazo fiononana avy amin'inona na inona afatsy ny Teninao. Fa ny fampiononanay, dia ny Fampanantenanao. Ary ao amin'ny Fampanantenanao, dia Ianao no nilaza mba hampahafantatra an'ireo fangatahanay, ary "Raha hangataka zavatra amin'ny Anarako ianareo, dia Hataoko izany." Ary ireto Fampanantenana lehibe ireto: "Mangataha dia hahazo ianareo. Mitenena amin'io tendrombohitra io hoe, 'Mifindrà,' ka tsy misalasala, dia hifindra izany." Ireo Fampanantenana rehetra ireo, ary afaka misintonia avy amin'Izany fotsiny an'izay angatahanay izahay.

²⁶ Nitsangana ireo tānana, mila zavatra izy ireo, Tompo. Ianao no mahafantatra ny ilain'izy ireo; atolory izany, Ray. Apetrako miaraka amin'ny azy ireo eo Anatrehanao ny fivavako, ny tānako mitsangana miaraka amin'ny azy ireo. Indro mipetraka eto ambonin'ity latabatra eto ity, mipetraka eto ireo mosara. Oh, toy ny ahoana ireo olona miaraka amin'ny finoana, finoana mahery, Tompo, . . . Toy ny hoe zavatra izay efa avy Nitahianao ahy mihtsy izany, afaka mivavaka ho an'ny olona marary. Na aiza na aiza, manerana, na aiza na aiza alehako, dia zavatra anankiray ny amin'ny fivavahana ho an'ny marary. Andriamanitra, manampia ankehitriny. Mivavaka amin'ny fahatsoram-po aho mba Hanekenao ny fangatahan'ireto mosara izay napetraka eto ireto, ho an'ireo olona izay nangataka. Aoka ny Famindramponao ho eo amin'izy ireo.

²⁷ Tompo, fantatray fa manana vehivavy anankiray eto i Ranabavy Hicks, izay nandeha fiaramanidina avy any lavitra

any ho any mba hivavahana, miaraka amin'ny homamiadana; ary te-hahafantatra raha afaka mitondra azy izy mba ho tonga eto. Mivavaka aho, Andriamanitra, mba Hitehirizanao ny ain'io olona io; ekeo izany. Ny zanaka kelin'ny iray tampo amiko, Mikie, nandry narary tany ary nandò, niaraka tamin'ny tazo mahery; vao avy nandao ny varavarana aho. Tompo, izaho—izaho dia mino fa nanao ny vavaky ny finoana izahay tany mba Hampijanonanao an'izany, ary izaho—izaho—izaho dia mankasitraka Anao, nahatsapa fa niala tamin'ilay zazalahy ilay tazo talohan'ny nialako an'ilay efitra.

²⁸ Ankehitriny, Tompo, . . . ary misaotra Anao ny amin'ireo zavatra rehetra ireo. Ankehitriny dia anjarako ny miresaka ny amin'ny Teninao. Omeo anay ny Teninao, Tompo. "Ny Teninao no Fahamarinana." Tahio ny fanahinay ary omeo anay ny—ny fahasoavana izay ilainay, mba hahafahanay misintona avy amin'io Fampantanen'an'Andriamanitra io izao hariva izao, ao amin'ny Teny, mba hanohana anay amin'ny sisa amin'ity herinandro ity; ekeo izany. Tahio ny pasiteranay, ilay fanahy mahery, ny vadiny, ireo zanany, ireo diakona, ireo mpitantan-draharaha, ary ny olona rehetra izay miditra sy mivoaka amin'ity tranobe ity; ekeo izany, Ray. Amin'ny Anaran'i Jesosy Kristy no angatahanay an'ireo fitahiana ireo. Amena.

²⁹ Ankehitriny, dia tiako ny hamaky avy ao amin'ny toerana anankiroa an'ireo soratry ny Tompo. Tiako ny hamaky avy ao amin'ny Bokin'ny Salamo aloha, ny Salamo faha-86. Ary avy eo dia tiako ny hamaky avy ao amin'ny Masindahy Matio, ny toko faha-16, 1 ka hatramin'ny 3. Ary tiako ny hamaky ampanahany avy ao amin'ity Salamo ity, tsy izy rehetra fa hatramin'ny andininy faha-11, izay mihoatra kelin'ny antsasany.

³⁰ Ary tiako ny hilaza an'izao, raha miantso lohahevitra iray aho, alohan'ny hitoriana azy: *Ny Fotoan'Ny Fikambanana Sy Ny Famantarana*. "Ny Famantarana ny fotoan'ny fikambanana," toa ohatry ny sarotra kely izany. *Fikambanana*; hitanareo? *Fotoana*; fotoan'ny fikambanana, izany ilay izy ankehitriny. Ary ny *Famantarana* an'izany fotoan'ny fikambanana izany.

³¹ Ao—ao amin'ny Salamo, vavaka iray an'i Davida, ny Salamo faha-86.

Atongilano ny sofinao, O TOMPO, ka henoy aho: fa mahantra sy malahelo aho.

Arovy ny fanahiko; fa masina aho: O ianao no Andriamanitro, vonjeo ny mpanomponao izay matoky anao.

Mamindrà fo amiko, O Tompo: fa mitaraina aminaо isan'andro aho.

Ampifalio ny fanahin'ny mpanomponao: fa aminaо, O Tompo, no anandratako ny fanahiko.

Fa ianao, Tompo, no tsara, ary vonona hamela; ary be famindrampo amin'izay rehetra miantso anao.

Mandrenesa, O Tompo, ny fivavako; . . . henoy ny feon'ny fifonako.

Amin'ny andro fahoriako no hiantsoako anao: fa ianao dia hamaly ahy.

Oh, tsy mahafinaritra ve izany? “Ianao dia hamaly ahy.”

Eo anivon'ireo andriamanitra rehetra dia tsy misy tahaka anao, O Tompo; ary tsy misy tahaka an’ny asanao.

Ny firenena rehetra izay nataonao dia ho avy sy hiankohoka eo anatrehanao, O Tompo; ianao no hanome voninahitra ny anaranao.

Fa lehibe ianao, ka manao zava-mahagaga: ianao irery ihany no Andriamanitra.

Henoy ankehitriny.

Ampianaro ny lèlanao aho, O Tompo; izaho—izaho dia handeha amin'ny fahamarinanao: ampiraiso ny foko hatahotra ny anaranao. (Fraisana! Hitanareo?) . . . ampiraiso ny foko hatahotra ny anaranao.

³² Miresaka aho ankehitriny ny amin'ny fikambanana; sy fotoan'ny famantarana. Ankehitriny, ao amin'ny toko faha-16 an'i Masindahy Matio.

Ny Fariseo ihany koa niaraka tamin'ny Sadoseo dia tonga, . . . naka fanahy azy, naniry azy mba hahafahany haneho famantarana iray avy any an-danitra ho azy ireo.

Ary Izy namaly ka nanao tamin'izy ireo hoe, Rehefa hariva ny andro, ianareo dia milaza hoe, izaho . . . Ho tsara ny andro: satria mena ny lanitra.

Ary amin'ny maraina, Izany dia ho ratsy . . . ho ratsy be ny andro: satria mena sy manjombona ny lanitra. O ianareo mpihatsaravelatsihy, ianareo dia mahay mamantatra ny tarehin'ny lanitra; fa ianareo ve dia tsy mahay mamantatra ny famantarana ny fotoana?

Ny Tompo anie hanampy ny Fitahiany lehibe amin'ny famakiana an'izany Teny izany.

³³ Ankehitriny, miresaka an'izao fikambanana izao isika, ny fotoan'ny fikambanana; ny famantarana ny fotoan'ny fikambanana. Hitanareo, teto Jesosy, ao amin'ity famakiana farany ny Soratra ity, nananatra an'ilay mpitondra fivavahana Izy nohon'ny tsy nahaizany namantatra ny fotoana na ny famantarana ny fotoana. Ankehitriny, izany dia zavatra anankiray lehibe foana ho an’ny olona, hitanareo, ny mahay mamantatra ny famantarana ny fotoana izay iainanareo; satria

Andriamanitra dia nanoratra an'izany mazava mba tsy hisy olona iray ho afa-miala amin'izany.

³⁴ Ankehitriny, mazàna, dia miverina any aoriana aho ary maka avy amin'ireo mpitoriteny hafa, ireo mpanompon'ny Tompo hafa tamin'ny andron'ny Baiboly (toy ny famantarana tamin'ny andron'i Noa, ny famantarana tamin'ny andron'i Daniela sy—sy ny sisa, ireo famantarana samihafa), saingy te-hiala amin'izany aho izao hariva izao mba—mba hananana fotoana, mba hahafahana...Fa fomban'Andriamanitra foana izany, ny manome azy ireo ny—ny famantarana ny fotoana araboajanahary iray, mba hahafantaran'ny tsirairay fotsiny hoe fotoana inona ilay—ilay izy. Ary ireto Fariseo ireto dia tokony ho nahafantatra ny fotoany. Tokony ho fantatr'izy ireo hoe inona ilay fotoana. Izy dia niteny any amin'ny toerana hafa iray hoe, "Raha nahafantatra Ahy ianareo, dia ho nahafantatra ny Androko ianareo." Hitanareo? Izany—izany no tena—tena zavatra lehibe iray izay fantarintsika. Hitanareo, "Tsy manam-pahalalana!"

³⁵ Izany no antony nianteheran'izy ireo foana tamin'ireo mpaminany, hoy izy ireo hoe, "Ary nanam-pahalalana izy, tamin'ny alàlan'ireo fahitana avy tamin'ny Tompo. Ary ny Tenin'ny Tompo dia tonga tamin'ireo—ireo mpaminany fahiny." Hitanareo, nanam-pahalalana izy ireo tamin'ny alàlan'ny Tenin'ny Tompo, tamin'ny alàlan'ireo mpaminany. Ary tamin'izany fotoana izany—ireo mpaminany no nanome famantarana iray. Ohatra, nisy lehilahy iray nandry tamin'ny ilany nandrity ny ela, avy eo dia nivadika izy ka nandry tamin'ny ilany hafa. Lehilahy iray no tsy maintsy nanala ny akanjony. Ary oh, misy zavatra maro izay nataon'izy ireo mba hanehoana an'ilay famantarana izay niainan'izy ireo. Ary ankehitriny dia fantatsika fa Andriamanitra izay nanao ny lanitra sy ny tany, ary—ary nampiseho mihitsy ny Asany mba Hamaritany ny Fotoany amin'ny alàlan'ny famantarana, izany Andriamanitra tsy miova izany dia velona amin'izao andro izao. Noho izany isika dia tsy maintsy, ho zavatra iray...Arakaraky ny ahitantsika ny—ny fotoana izay iainantsika, no tsy maintsy hisian'ny zavatra anankiray izay tsy hitan'ny olona, any ho any. Hitanareo? Satria Andriamanitra dia tsy hamela mihitsy an'ireo zavatra ireo hitranga raha tsy manome antsika famantarana miavaka tsara, izay mba, mba—mba hahafantarantsika.

³⁶ Ankehitriny io ilay zavatra amin'izao andro izao, izay ny mpitondra fivavahana, tsy mamaky tsara an'ilay izy isika. Ilay izy dia tahaka azy tamin'izany fotoana izany mihitsy, tsy nieritreritra izy ireo fa io ilay fotoana. Izy ireo—izy ireo dia nihevitra fa niaina am-pilaminana tsara izy ireo tamin'izany fotoana izany, ary noho izany dia tsy niandry ny Mesia izy ireo. Ary Jesosy efa niteny fa ny Fihaviany dia ho "toy ny mpangalatra amin'ny alina," rehefa ny—rehefa ny olona tsy hahafantatra ny

Fihaviany. Fa nisy an'ireo virijiny sasany izay nandeha nitsena Azy, ny antsasak'izy ireo, no nanana solika tao amin'ny fanilony ary vonona; nanara-maso an'io famantarana io izy ireo. Ary izy ireo no iresahako izao hariva izao, hitanareo, ho an'ireo izay miandry an'ilay famantarana ankehitriny, ilay famantarana ny Fihaviany.

³⁷ Ireo famantarana nomena ireo, avy tamin'ny Tompo, dia nomena ho an'ny mpino irery ihany. Tsy mahita azy mihitsy ireo tsy mpino. Mandalo eo ambonin'izy ireny fotsiny izy ireo, ary tsy hitany izany. Ary ankehitriny, azo antoka mihitsy tahaka ny hahafahan'ny Anjelin'Andriamanitra iray hijoro eto amin'ity lampihazo ity izao hariva izao, marina mihitsy tahaka—tahaka ny nijereko anareo, ka afaka mijery azy aho; na ianareo afaka mijery azy fa izaho tsy afaka mahita azy, na izaho afaka mijery azy fa ianareo tsy afaka mahita azy. Ankehitriny, fantatrareo fa ara-tSoratra izany; izany tanteraka tokoa ny Fahamarinana. Izy ireo dia nahita... Fantatrareo fa nianjera i Paoly, fa izy ireo... tsy nisy tamin'izy ireo afaka nahita an'ilay Hazavana.

³⁸ Teo io Hazavana io rehefa nitsangana teo anoloan'ireo olona marobe i Jaona, ary an'arivony no teo amin'ny morony teo, ireo lehilahy mpitondra fivavahana sy—sy ireo olon-kendry, ireo lehilahy malaza. Ary Jaona no nilaza, izy irery, nanao fanambarana izy fa nahita ny Fanahin'Andriamanitra nidina tahaka ny voromailala ary tonga teo Aminy, ary nisy Feo iray nanao hoe, "Ity no Zanako malalako Izay Sitrako honenana." Ary tsy nisy olona nahita an'Izany afa-tsy i Jaona. Hitanareo? Ho azy fotsiny ihany izany.

³⁹ Efa voamarikareo ve hoe hita maso toy ny ahoana, ilay famantarana ho an'ireo magy? Nijery izy ireo, dia nisy... Hebreo izy ireo. Tsy tena Indiana mpandinika habakabaka izy ireo, Hebreo izy ireo; satria tany amin'io firenena io izy ireo no nianatra ny fandinhana habakabaka, mba hamarana ny fianarany. Ary izy ireo rehefa... nijery nankany Jerosalema, ka nahafantatra fa izy ireo dia nahita an'ireo kintana telo ireo avy amin'ny tsirairay avy amin'ireo—ireo taranany, avy amin'i Hama, Sema, ary Jafeta, ny amin'ny firazanana izay nihavian'izy ireo, ny tsirairay, ary hitany ireo kintana ireo tao amin'ny taranany. Famantarana iray ho azy ireo izany, ka rehefa nifanitsy ireo kintana ireo, dia teto an-tany ilay Mesia.

⁴⁰ Oh, oadray! Tsy mahagaga raha tonga izy ireo, "Aiza Izzy? Aiza Izzy izay teraka ho Mpanjakan'ny Jiosy? Nahita ny Kintany tany Atsinanana izahay, ary tonga mba hiankohoka eo Aminy. Aiza Izzy?" Fantatr'izy ireo fa nandry tany ho any io Mesia zaza io, satria Andriamanitra no nanome azy ireo ny famantarana ny fotoana, hoe Andriamanitra sy ny olona dia nikambana niaraka. Fikambanana toy ny inona, rehefa Andriamanitra no mampikambana ny Tenany ao amin'ny vatan'olombelona iray! Ny zava-dehibe, ny lehibe indrindra amin'ireo fikambanana

izay natao ireo, dia rehefa Andriamanitra no mikambana amin'ny olona; ary namela Ny—Ny fitarihany lehibe amin'ny maha-Andriamanitra ka nanitatra ny Lainy ary naka ny olombelona, ary lasa iray amin'izy ireo, mba hanavotra azy ireo. Fikambanana. Inona izany? Izany no nitondra ny filaminana teo amin'Andriamanitra sy ny olona mandrakizay; toy ny ahoana no ankasitrahantsika.

⁴¹ Ary ireo famantarana dia tsy nirahina... Ankehitriny dia eritrereto fotsiny, ny olona rehetra, ary ireo mpandinika habakabaka rehetra; ny olona tamin'ireo andro ireo, ny famantaranandron'izy ireo dia ny kintana. Nisy mpiambina iray nandeha teny an-tampon'ilay-ilay tilikambo, ary niakatra teo izy ka nandinika. Ary hitany fa rehefa tao anatin'ny andian-kintana iray ireo kintana sasany, rehefa nandalo izy ireo, dia fantany hoe tamin'ny firy izany. Tsarovy ao amin'ny Soratra, "Amin'ny firy izao, ry mpiambina?" Ary niverina ilay mpiambina ka niteny taminy hoe amin'ny firy ilay ora. Hitanareo, njery ny fotoana tamin'ny alàlan'ny kintana izy ireo.

⁴² Ankehitriny, tsy hafahafa ve fa ireo kintana ireo dia nilahatra tanteraka mihitsy ho an'ireo lehilahy anankitelo nefá tsy nisy olona hafa nahita azy? Hitanareo? Tena nilahatra tanteraka mihitsy. Ankehitriny, afaka tena milahatra amin'ny Soratra koa ianareo. Hitanareo? Rehefa lasa ao anatin'ny fikambanana ireo kintana ireo, nanakambana ny tenany niaraka ao amin'io andian-kintana io, dia nikambana koa ireo lehilahy anankitelo ireo tamin'io fotoana iray io. Ary afaka tena mikambana amin'Andriamanitra koa ianareo, ao amin'ny Teniny, hany ka lasa zava-misy ireo zavatra ireo, ary afaka mahita azy ireny ianareo ka mahafantatra fa marina izy ireo. Hitanareo? Ny famantarana ny fotoana! Mety mijery eo amin'ny tampon'izany mihitsy ianareo, manao hoe, "Ah, hadalana!"

⁴³ Fa ho *anareo* kosa dia tsy hadalana ilay izy. Ho anareo, dia mikambana amin'ny Teny ianareo, ary ity eto ity Izany. Amin'izay fotoana izay ilay izy dia—ilay izy dia tena Hazavana tanteraka tokoa, Rahalahy Pat, rehefa—rehefa—rehefa—rehefa mahita an'io famantarana io mikambana amin'ilay mpino ianareo. Ary aminy no hilazako an'izao, dia ilay mpino, satria tsy mahita an'izany mihitsy ilay tsy mpino. Ary ho fananarana toy ny inona ilay izy raha teto an-tany Izy androany; ho an'ny maro amin'ireo mpitonundra fivavahana antsika amin'izao andro izao, izay tsy afaka mamaky an'io famantarana io; ireo famantarana izay vakantsika isan'andro eto amin'ity tabernakla ity, ka mahita an'ireo zavatra. Ary ny sasany dia mamaky an'izany ka mahita an'ilay sora-tànana teo amin'ny rindrina, kanefa dia maro no tsy mahalala azy, ary tsy mahita azy akory mihitsy aza. Tsinontsinona amin'izy ireo mihitsy izany; tsy mahamarika an'izany izy ireo.

⁴⁴ Ankehitriny mariho, fa ao amin'izany, dia Izy—Izy no nanondro an'ireo famantaram-pirenena. Ankehitriny, rehefa nanontany Azy mikasika an'izany izy ireo, dia nila famantarana izy ireo; ary nanome famantarana azy ireo Izy izay nitranga. Ary izy ireo dia te-hahafantatra hoe rahoviana ilay fiafaran'izao tontolo izao, ho inona ilay famantarana any amin'ny farany. Ary Natorony azy ireo ny toerana maro ao amin'ny Soratra mikasika an'ireo famantaram-pirenena, mikasika ny famantaran-danitra eny amin'ny lanitra, ary ny famantaran'ny tany; Izy dia nanome azy ireo famantarana, famantarana, famantarana, famantarana iray tsy an-kitsahatra mihitsy. Ary rehefa Nolazainy tamin'izy ireo tao amin'ny toerana anankiray ny mikasika ny famantaram-pirenena iray, dia hoy Izy hoe, “Rehefa hitanareo ireo firenena, hitanareo, fa manomboka miangona manodidina an'i Jerosalema, hitanareo, amin'izay fotoana izay dia fantatsika fa automotra ny fotoan'ny fahorian'izy ireo, rehefa mahita an'i Jerosalema voahodidin'ny tafika ianareo.”

⁴⁵ Ankehitriny, mialohan'ny nahafahan'izy ireo nanao an'izany, Andriamanitra... Tsy maintsy nikambana izao tontolo izao. Titus, ilay jeneraly Romana lehibe no tsy maintsy nanakambana an'ireo tafiny niaraka ary tonga teo, rehefa avy nandà ny famantarana ny fotoana nomen'Andriamanitra azy ireo Jiosy ireo. Izany no fotoana izay nanakambanan'i Titus ny tafiny niaraka, ary tonga naka an'ilay tanàna. Voalohany dia tsy maintsy nisy ny fikambanan'ny vahoakan'Andriamanitra (natao ho izany) nanohittra ny Tenin'Andriamanitra, alohan'ny nahafahan'io firenena io nanakambana ny tenany hanohittra ny vahoakan'Andriamanitra. Hitanareo, ilay—ilay—ilay firaisansa, ilay fikambanana; mikambana miaraka.

⁴⁶ Mino aho fa isika dia miaina ao anatin'ny fotoan'ny fikambanana iray lehibe. Mitondra an'ireo jiro mena aho, sy ireo famantarana mipiapiaka sy ny sisa (ny amin'ireo vehivavy, ahoana no ataony; ary ireo lehilahy, ahoana no ataony; ary ireo fiangonana, ahoana no ataony), maneho amin'ity vondrona kely ity, amin'ny foko rehetra, fa mino aho fa isika dia milahatra eo amin'ilay laharan'ny Tenin'Andriamanitra ao amin'izao ora ara-paminaniana lehibe izao, mialoha indrindra ny fihavian'ny Tompo Jesosy; mikambana miaraka ary miomana.

⁴⁷ Ankehitriny, hitanareo, mialohan'ny nanakambanan'i Titus ny firenen'ny... ny tafiny miaraka, dia nanakambana ny tenany niaraka ny Isiraely ary nampivondrona ny tenany, mba tsy hinoan'izy ireo an'i Jesosy ho ny Mesia. Nolavin'izy ireo Izy, sy noroahany Izy, ary nohomboany Izy. Ary tamin'izay fotoana izay, rehefa nolavin'izy ireo ilay famonjena izay nalefa ho azy ireo, dia nanakambana ny tenany niaraka izy ireo mba hanao an'ilay izy. Ankehitriny, hazony ao an-tsaina izany: mampikambana ny tenany miaraka, mba handà an'ilay Hafatry ny ora! Tsy maintsy nanao an'izany izy ireo. Ary tamin'izay

fotoana izay rehefa nataon'izy ireo izany, dia tonga ilay famantaram-pirenena.

⁴⁸ Nanomboka nanakambana ny tenany niaraka ireo firenena, ary nentin'i Titus ilay tafika lehibe an'ny Romana sy Grika ka nanodidina an'ireo rindrin'i Jerosalema, namefy an'ireo olona ireo tao ankehitriny, ary matin'ny hanoanana izy ireo. Nihinana ny hoditr'ireo hazo izy ireo. Josephus, ilay mpanao tantara malaza, no miteny amintsika. Ary nihinana ny ahitrin'ny tany izy ireo. Nampangotrahan'izy ireo mihitsy aza ireo zanaky ny hafa dia nohaniny izany; hitanareo, tahaka ny olona adala izy ireo. Ary tamin'izay fotoana izay rehefa, farany, Titus, dia nipetraka tao ambadik'ireo havoana izy, nanodidina an'i Jerosalema tany, ary—ary ireo olona tao anatiny tao ireo dia nihevitra fa nanao ny sitrapon'Andriamanitra izy ireo, rehefa hitan'izy ireo fa nuditra ireo tafika ireo. Nandà ny hihaino an'ilay Mpampianatra Lehibe izy ireo, Tompo Jesosy, izay niteny an'izany tamin'izy ireo.

⁴⁹ Tsy nisy na dia ny anankiray tamin'ireo Kristiana aza tratra tao anatiny tao, satria efa nahita an'ilay famantarana izy ireo ary niala. Hitanareo? Hoy izy ireo hoe, "Aoka izay eny antampon-trano tsy hidina, na izay any an-tsaha tsy hiverina, tsy haka ny kapôtiny; fa mandosira mankany Jodia, ary mivavaha mba tsy handosiranareo amin'ny andro ririnina na amin'ny Sabata." Satria, amin'ny andro ririnina, ny—ny havoana dia ho feno oram-panala; ary amin'ny andro Sabata, ny varavarana, ireo varavarana dia hihidy, ny vavahady, ka ho tratra ao amin'izany toerana izany izy ireo. Hitanareo? Maniry ny ho tonga eo amin'izany tsy ho ela mihitsy isika mikasika ny...ahoana no anaovan'Andriamanitra an'ireo zavatra ireo, raha sitraky ny Tompo.

⁵⁰ Mariho ankehitriny, Izy...Nivavaka izy ireo mba ho izany...tsy ho toy izany ilay izy, Jesosy no niteny tamin'izy ireo mba hivavaka ho an'izany, ary tsy nahatratra ny anankiray tamin'izy ireo mihitsy izy ireo tao anatiny tao. Lasa izy ireo satria njery an'ilay famantarana izy ireo, ary lasa izy ireo; izay ihany no nisy tamin'io.

⁵¹ Oh, toy ny ahoana no tokony hahitan'ireo fiangonana amin'izao andro izao an'ilay famantarana ny fotoana izay iainantsika! Mandosira haingana arak'izay azonareo atao mankany Kalvary, ho an'ny Fiainana; tsy mankany amin'ny fiangonana iray, fa mankany amin'i Jesosy Kristy. Akambano Aminy ny tenanareo, fa tsy amin'ny rafi-pandaminana iray na fanekem-pinoam-pianganana iray. Mikambàna amin'i Kristy, ary aoka hahazo antoka fa Izy izany. Tsy afaka maka zavatra anankiray fotsiny ianareo, tsy maaintsy fantatrareo tsara fa Izy izany. Fotoan'ny fikambanana toy ny inona!

⁵² Ankehitriny, dia hitantsika fa nandà ny Mesia izy ireo ary avy eo dia nanakambana ny tenany niaraka ka nitarika vondrona

iray ho an'ny tenany, ary nanao ny—ny . . . volavolan-kevitra iray teo anivon'izy ireo fa raha misy olona nandray an'i Jesosy ho Mpaminany iray, dia horoahina hiala amin'ny fiangonana izy ireo. Tsaroanareo ve ilay zazalahy jamba izay nипetraka niaraka tamin'ny maso jamba? Ary hoy ireo mpianatra hoe, "Iza no nanota? Izy, sa ny rainy, ny reniny?"

⁵³ Dia hoy Jesosy hoe, "Amin'ity zava-misy ity, dia tsy misy; fa mba hanaovana ny asan'Andriamanitra, ho fantatra."

⁵⁴ Ary tsarovy, fa nilaza izy ireo fa ilay ray sy reny dia tsy afaka nilaza. Hoy izy ireo hoe, "Fantatr'izy ireo fa zanakay ity, saingy tsy fantatray kosa hoe ahoana no nahasitrana azy." Satria ireo Jiosy dia efa nilaza fa ny olona izay manambara Azy ho Mpaminany, dia horoahin'izy ireo izany.

⁵⁵ Fa, hitanareo, ireo asan'Andriamanitra dia hoe io zazalahy io dia tsy nikambana tamin'izany vondrona izany. Ary hoy izy hoe, "Ankehitriny, zavatra hafahafa amiko ny tsy hahafantaranareo hoe avy taiza io Lehilahy io, kanefa dia Izy no nanome ahy ny fahiratako." Hitanareo? Ankehitriny, afaka niteny an'izany izy. Hitanareo, izany no asan'Andriamanitra. Efa nositranina izy, ary salama, ka izy dia afaka—izy dia afaka niteny an'izany satria tsy nanana tady namatotra azy na avy taiza na taiza izy. Izy no anankiray amin'ireo asa izay vita, ary hitany tokoa ny . . . ny fotoany voalohany teo amin'ny fiainany.

⁵⁶ Ankehitriny, ireo Jiosy dia nampikambana ny tenany hanohitra an'i Jesosy ary—ary hanohitra ny maha-Mesia Azy, sy ny Hafany Mesianika. Hitantsika fa ilay zavatra mitovy no mitranga ankehitriny, tena ilay zavatra mitovy. Ny Kominisma dia mikambana mba hamotika ny fiangonana, ary ny fomba tokana ho an'izany . . . izany dia rehefa avy nampikambana ny tenany ihany koa ny fiangonana, tao amin'ny Fiombonamber'ny Fiangonana, ny Fiombonamber'ny Fiangonana Maneran-tany, mba handà sy handrava ny Hafatra, ny Teny! Nandà ny Teny izy ireo, ireo fiangonana no nanao an'izany! Tsy afaka manaiky an'Izany izy ireo satria manohitra an'ireo fanekem-pinoan'ny anaram-piagonany Izany; tsy mampaninona na firy na firy ny Andry Afo hihantona eo amin'ny . . . eo afovoan'ny olona, na firy na firy ireo olona izay . . . na firy na firy ireo zavatra izay voalaza mialoha ary nitranga, ary ireo famantarana lehibe izay Nampanantenainy ho an'ny andro farany; tsy afaka manao an'izany izy ireo.

⁵⁷ Noho izany, dia eo am-pampikambanana ny tenany izy ireo ankehitriny, ary ny pasiteranareo eto sy ny maro dia afaka miteny aminareo, ireo izay mamaky, fa izy ireo dia . . . manana an'ilay hetsika ekiomenika an'iao—iao—iao tontolo izao. Ary ny . . . misy mpitoriteny Loterana iray eo ambonin'izany. Izany hoe, raha tonga ny loza iray, hitranga eto amin'ity mpiaramonina eto ity; raha tsy mikambana amin'io hetsika ekiomenika

io isika, amin'izay fotoana izay dia tsy mety ho fiangonana iray intsony ny fiangonantsika, ary afaka mampiasa azy ho fitoeran'entana iray izy ireo. Na raha ny anankiray amintsika rahalahy ireto no mahita olona iray eo am-pahafatesana na maratra, ka manandrana mikarakara azy amin'ny fitahiana Ara-panahy, dia mety ho voatifitra isika amin'izany; tena marina. Mety hahazo folo taona ao anatin'ny fonja federaly isika nohon'ny fikarakarana zavatra iray, satria tsy mambra iray ao amin'io hetsika ekiomenika io isika. Tsy hitanareo ve ilay mariky ny bibi-dia? Hitanareo? Hitanareo?

⁵⁸ Ankehitriny, dia hitantsika fa tonga io fotoan'ny fikambanana io. Hitanareo? Ankehitriny, diniho! Ary dia nanakambana ny tenany nanohitra ny Hafatra ny fiangonana; ary amin'izay fotoana izay rehefa manao an'izany izy, dia manakambana ny tenany ao amin'ny Kominisma ireo firenena mba hamotika ny fiangonana indray; tena tahaka ny nataony tamin'ny voalohany mihitsy. Hitanareo? Mbola miverina mihitsy indray izany.

⁵⁹ Tsy maintsy nandà ny Hafatra aloha ny Isiraely. Ary rehefa nandà ny Hafatra izy ireo, dia ny miaramila, ny fiainam-pirenena no nanakambana ny tenany niaraka (tamin'ireo firenen-kafa), ary niditra ka namotika an'ilay fiangonana. Ary amin'izao andro izao, dia nandà ny Hafatry ny Tompo Jesosy izy ireo, ary nandà Azy izy ireo. Ary ankehitriny, dia tonga ny fotoana izay hanakambanan'ny Kominisma an'izao tontolo izao miaraka hanohitra ny fiangonana. Hitanareo, tsy maintsy ho toy izany ilay izy. Ankehitriny, sarotra ny miteny an'izany.

⁶⁰ Sarotra ho an'ireo Jiosy ireo ny nino, hoy izy ireo hoe, "Ankehitriny avia, rahalahy, hitantsika fa-fa ny—ny Andriamanintsika dia momba antsika, ka noho izany isika dia—dia hiditra ao an-tempoly. Ary ankehitriny isika dia hivavaka, ary aoka ny ray masina *Ranona-sy-ranona* ary ny ray masina *Ranona-sy-ranona* no hitarika amin'ny vavaka. Hidio ny vavahady!" Ary naka ny toerany i Titus, ary nijanona teo fotsiny nandritry ny herintaona teo ho eo na mihoatra. Hitanareo, niambina mihitsy, ary nanao azy ireo ho noana tao mihitsy. Tsy nisy na dia ny anankiray tamin'izy ireo aza mba afaka nivoaka tany ivelan'ny tanàna; ary maty izy ireo, noana. Ary rehefa niditra tao izy ka nandrava an'ireo rindrina, dia nijininika ny rà ary nikoriana tahaka ny renirano tao amin'ny toerana izay namonoany ny zavatra rehetra izay tao anatiny tao.

⁶¹ Ankehitriny, ilay Anjelin'ny Tompo no naminany an'izany, tany amin'ny Testamenta Taloha, ary nilaza fa izany no hitranga. Ary ireo mpitoriteny izay mpitondra fivavahana ireo, ireo izay natao hijoro teo amin'izany sy hilaza an'izany amin'ny olona; raha tokony ho izany, rehefa nitsangana teo anivon'izy ireo Jesosy, dia tsy nahafantatra Azy akory aza izy ireo; ary niezaka nanao ny—ny—karazan'ny—ny tongom-

bitro anankiray, "Manaova fanehoam-pahaizana iray aminay, avelao izahay hahita hoe ahoana—ahoana no nahavita an'ilay izy! Anehoj famantarana iray izahay." Hitanareo? Ary hoy Izy hoe, "Izaho . . ." Nahoana, nanao zavatra maro Izzy, kanefa dia tsy afaka nahita an'izany izy ireo. Hitanareo? Ary tamin'izay fotoana izay rehefa nandà Azy izy ireo ho . . . ny Hafatr'io andro io, dia nandà ny Hafatr'io andro io izy ireo.

⁶² Diso tamin'ny fahitana an'ilay famantaran'io andro io izy ireo. Ary ny famantaran'ny—ny faminanian'ny Baiboly dia efa natao teo anatrehan'izy ireo, ary hoy izy ireo hoe, "Ndao isika hiditra ankehitriny!" Lehilahy masina izy ireo. Izy ireo dia lehilahy izay tsy azonareo tondroina amin'ny fanondronareo ny fiainany. Izy ireo tsy mety ho *izao*, ary avy eo—ary avy eo ho—ho—ho mpisorona iray. Ny mpisorona iray dia ho vonoina, ho voatora-bato ho faty izy ho an'ny zavatra kely anankiray. Noho izany izy dia tsy maintsy niaina fiainana iray madio, masina. Tsy afaka nanao an'izany izy, satria ho voatora-bato amin'ny tsinontsinona fotsiny izy. Ary ankehitriny dia lehilahy malaza izy ireo, ary lehilahy masina eo imason'ny olona, kanefa dia nandeha izy ireo ka nanao hoe, "Ankehitriny, isika dia . . . Manana an'Andriamanitra isika, ilay Andriamanitra Izay nomba antsika nandrity ny taona maro. Hiditra ao amin'ny Tempoliny masina isika." Io no tempoly masin'Andriamanitra! Saingy, hitanareo, nandà an'ilay Tempoliny masina Izzy. Hitanareo? "Hiditra ao an-tranon'ny Tompo isika. Ankehitriny ianareo Hebreo rehetra ireo dia mahafantatra fa isika no taranaka voafidy, izany isika, eto. Ary Andriamanitra no Andriamanintsika; Andriamanitri'i Abrahama, Isaka, ary Jakoba. Momba antsika Izzy. Hanafaka antsika amin'ireo Filistina tsy mifora eo ireo Izzy (tahaka azy taloha), ireo Romana sy Grika. Hanafaka antsika amin'ireo Izzy. Ndao isika hiditra ao an-tranon'ny Tompo!"

⁶³ Toa ohetry ny tsara izany; saingy inona no nataon'izy ireo? Ny Mpanorina an'ilay trano dia tao anatin' tao, tao amin'ny endrika mpandrafitra Galiliana manetry tena iray, nefà dia nandà Azy izy ireo; rehefa nanamarina Azy Andriamanitra ho Irany ho an'ilay ora, sy ilay Sampana. Ary nolavin'izy ireo Izany. Noho izany ny vavaka rehetra, ny fahatsorampô rehetra, ny fanatitra rehetra dia tsy nidika na inona na inona tamin'Andriamanitra. Nanao an'izany izy ireo! Fa navelan'Andriamanitra hikambana io tafika lehibe io mba hamotika azy.

⁶⁴ Ary mahita isika amin'izao andro izao, fa ireo fiangonana amin'ny alàlan'ireo anaram-piangonana sy ny sisa, dia mandà ny Tenin'Andriamanitra. Tsy tian'izy ireo ianareo hiteny aminy mikasika an'ireo zavatra ireo, nefà ny siansa dia afaka manaporofa an'izany amin'ny alàlan'ny sary sy ny zavatra hafa, nefà dia mbola tsy te-hanao na inona na inona amin'Izany izy

ireo. Noho izany dia mivondrona ny kominisma mba handrava azy, tahaka ny nataon'i Titus mihitsy, ary ny Baiboly no nilaza fa hataon'izy ireo izany. Marina tokoa!

⁶⁵ Ankehitriny, hitanareo ve hoe aiza isika no miaina? Ilay fotoan'ny fikambanana. Rehefa hitantsika fa mikambana ireo zavatra ireo, oh; nahoana, diso amin'ny fahitana an'ireo zavatra ireo isika! Ianareo dia afaka—ianareo dia afaka mijery ato anatin'ity Soratra ity ka mahita hoe aiza no Nampanantenainy an'izany, inona no Hataony. Ankehitriny, hitantsika izany fa miseho. Hitantsika ao amin'ny fiangonana izay Nampanantenainy fa hatao; hitantsika izany fa miseho. Hitantsika ireo firenena fa mikambana miaraka. Hitantsika ireo isma fa mikambana miaraka. Hitantsika ireo fiangonana fa mikambana miaraka. Izany no fotoan'ny fikambanana. Izany no oran'ny fikambanana. Izany no fanahin'ilay taona, "Tsy maintsy mikambana isika." Ny zavatra rehetra resahanareo dia tsy maintsy voarafitra; na dia ny governemanta aza dia tsy handray an'izany.

⁶⁶ Fantatrareo, amin'ny maha-teratany... Izaho dia tsy afaka amin'ny maha-teratany, amin'ny maha-teratanin'i Etazonia, kanefa aho—aho... hanome ahy taratasim-bola iray dimy dolara ianareo fa tsy ho sahiko ny hametraka ny anarako eo amin'izany. Hitanareo? Hitanareo, tsy ho vitako izany. Hitanareo, izany no fotoan'ny fikambanana iray. Izany rehetra izany dia tsy maintsy mandalo ao amin'ny karazana fikambanana iray, ary io fikambanana io no ilay tena zavatra izay mitondra ny mariky ny bibi-dia. Hitanareo? Izany no fotoan'ny fikambanana iray, ary izany no mampiditra mihitsy ao anatin'io. Afaka mahita an'izany fotsiny amin'ny masonareo tanteraka ianareo, raha mijery an'izany ianareo. Izany no fotoan'ny fikambanana iray, rehefa ny zavatra rehetra no mikambana miaraka.

⁶⁷ Ny Jiosy—ireo Jiosy dia nanakambana ny tenany nanohitra an'i Jesosy, ho ny—ho ny Mesiany. Noho izany, dia hitantsika izay niseho. Hitantsika ilay zavatra mitovy ankehitriny, ny kominisma mikambana mba hamotika ny fiangonana, taorian'ny nikambanan'ny fiangonana tao amin'ny Fiombonamben'ny Fiangonana Maneran-tany ary miezaka hamotika ny Hafatra, ny Tenin'Andriamanitra. Miezaka izy ireo ny hanala an'Izany. Ny zavatra tokana azon'izy ireo hatao dia ny mitarika ny tenany ao amin'ny fiombonambe iray, satria nisaraka izy ireo; vondrona kely iray eto, ireo Metodista, sy Batista, sy Loterana, sy Presbyterana, fiangonan'i Kristy, sy ny sisa tahaka an'izany. Tsy afaka manao na inona na inona izy ireo, satria *ity* anankiray *ity* dia hanohitra *an'ity* anankiray *ity*, *ity* anankiray *ity* dia manohitra *an'ilay* anankiray *hafa*, ny foto-pampianaran'izy ireo dia tena samihafa mihitsy tahaka ny atsinanana sy andrefana. Hitanareo, tsy afaka manao an'izany izy ireo. Fa vantany vao

miaraka, eo ambanin'ny loha lehibe iray, dia azon'izy ireo izany. Azon'izy ireo izany amin'izay fotoana izay.

⁶⁸ Izany ilay fomba mahatonga ny Katolika ho ao anatin'ny tena fikambanana, ny Katolika Romana, mazava ho azy fa ao anatin'ny fikambanana iray izy ireo, izy ireo dia... ny ankamaroany dia Katolika Romana; ny Grika sy ireo Katolika hafa dia—dia tsy betsaka tahaka ny Katolika Romana. Ankehitriny dia mikambana miaraka izy ireo, ary izany no antony hijoroan'izy ireo miaraka. Tsy mampaninona na inona na inona no miseho, fa io papa io no lohan'ny zavatra rehetra. Hitanareo? Ary tsy mampaninona na inona na inona lazain'ny olon-kafa manao hoe, "Tsy mety diso izy; izy no—izy no—izy no solontenan'Andriamanitra, dia izay ihany; izy no manaraka an'Andriamanitra; izy no manana fahefana mitsara eo amin'ny helo, ny Lanitra, ary ny afo fandiovana." Hitanareo? Noho izany dia tsy misy zavatra anankiray azo atao eo amin'io toe-javatra io; na inona na inona lazainy, dia tsy maintsy izay no andehanany.

⁶⁹ Ankehitriny, ireo Protestanta dia eo am-panaovana loha iray tahaka an'izany mihitsy, mitovy. Ary tsy milaza ve ny Baiboly fa nisy sary iray natao ho an'ny bibi-dia? Inona no atao hoe sary? Zavatra iray mitovy amin'ilay izy, natao mitovy amin'ilay izy. Izany ilay izy, ilay zavatra mitovy. Inona izany? Amin'ny alàlan'ny fikambanana miaraka, ary izany no fanahin'ilay taona, dia ny *fikambanana*.

⁷⁰ Mikambana miaraka ankehitriny, miezaka mamotika ny Hafatra. Ahoana no hamotehan'izy ireo Azy? Ahoana no hahafahan'izy ireo hamotika ny Tenin'Andriamanitra? Afaka manao an'Izany ho tsy misy heriny izy ireo, tsy misy fiantraikany, amin'ny alàlan'ny fandraisana an'ireo fombandrazana tahaka ny nataon'izy ireo tany tamin'ny fiandohana, ary nanao an'ilay Tenin'Andriamanitra ho tsy misy heriny. Hitanareo, hoy izy ireo hoe, "Oh, izany dia... Ny tena marina, na eo aza izany,..." Hitanareo eo ilay vehivavy tsy mahatoky izay miezaka ny... izy... Adinoko hoe iza ilay anarany ankehitriny; raha afaka nanonona azy fotsiny aho. Izy... Miezaka aho ny mieritreritra ny maro amin'izy ireny.

⁷¹ Nieritreritra an'ilay Miss Nations aho indray andro; maniry aho ny hananantsika anankiray hafa tahaka an'izany mba hitsangana. Izy ilay anankiray izay niditra tao amin'ny trano fisotroana ary namaky an'ireo whisky, ary nanipy an'ireo peta-drindrina tany ivelany sy ny zavatra tahaka an'izany. Nahoana no tsy misy vehivavy iray mitsangana tahaka an'izany amin'izao andro izao, ka mivoaka eto ary mandrovitra an'ireny sary mitanjaka an'ireo vehivavy avy amin'ny firazanany manokana, sy ireo zavatra tahaka an'izany? Izany, tsy manana an'izany intsony izy ireo.

⁷² Ankehitriny, fa io vehivavy io, tsy mahatoky anankiray, izay nilaza fa—fa “ny Baiboly dia tsy araka ny lalàm-panorenana, ny mamaky azy any amin’ireo sekolim-panjakana,” sy ny zavatra tahaka an’izany.

⁷³ Ankehitriny izy ireo ihany koa, mba voamarikareo indray koa ve, fa izy ireo dia miezaka ny milaza ankehitriny, ary ireo mpandinika malaza ny Soratra, dia milaza fa “maro amin’ireo faminaniana izay naminaniana ao amin’ny Baiboly no diso tanteraka, ary tsy niseho mihitsy.” Ary efa nandre ny amin’izany ianareo ary namaky an’izany. Ary miezaka izy ireo ny milaza ny zavatra rehetra; hitanareo, miezaka izy ireo ny mamotika ny herin’ity Teny ity. Raha afaka mamotika fotsiny izy ireo ka manolo an’Izany ho fanekem-pinoana iray na zavatra iray izay ananan’ny olona, izay ohatry ny tsaratsara kokoa eo imason’izy ireo noho ny Teny, amin’izay fotoana izay dia potehin’izy ireo Izany miaraka amin’ny—miaraka amin’ny fomban-drazany. Ary tahaka an’izany no ezahan’izy ireo mamotika ny Tenin’Andriamanitra, dia amin’ny alàlan’ny politikan’ny anaram-pianganana.

⁷⁴ Ankehitriny, ny fiangonana tsirairay dia manana ny politikany manokana. Ny fiangonan’i Kristy dia manana ny azy, ny fiangonana Kristiana dia manana ny azy, sy ny Batista, sy ny Metodista, ary ny Presbyterana; izy rehetra dia manana ny politikany samihafa. Ankehitriny, dia manalavitra an’izany izy ireo satria nisaraka izy ireo. Hitanareo, tsy azo natao izany taloha, fa tsy maintsy manao an’izany izy ireo ankehitriny. Hitanareo, izao no fotoan’ny fikambanana, ary mametraka azy miaraka izy rehetra ankehitriny ary manambatra azy dia jereo hoe inona no vokarin’izy ireo. Oadray, izany dia toy ny manao mofo avy amin’ny henan-tsoavaly, sy fako avy ao anatin’ny daba, sy inona koa no azon’izy ireo miaraka; ary mangaro an’izany miaraka, ka manampy ovy lò sy ny sisa miaraka, dia jereo hoe inona no vokarinareo. Azoko antoka fa tsy mila an’izany mihitsy aho. Tsia, tompoko! Izany no fomba ataon’izy ireo. Hitanareo, alain’izy ireo ny olona izay mino fa Jesosy dia angano iray, ny fiangonana izay mino fa Jesosy dia angano iray; ilay hafa, ny ssasany dia mino fa Izy dia Mpaminany iray.

⁷⁵ Ny anankiray manao hoe, “Efa lasa ireo andron’ny fahagagana.”

⁷⁶ Ilay hafa nanao hoe, “Mety misy izany zavatra izany.”

⁷⁷ Ary io rehetra io miaraka; ary hoy ny Baiboly hoe, “Ahoana no hahafahan’ny anankiroa miara-mandeha raha tsy efa nifanaiky izy ireo?” Hitanareo? Ankehitriny, io ilay karazana fikambanana izay ananan’izy ireo. Ary ny hanana ray masina lehibe iray hapetraka eo ambonin’izany, dia eo no hahazoanareo ny sary iray an’ny bibi-dia, tena marina araka ny lazain’ny Baiboly mihitsy. Ankehitriny dia manana mpitoriteny Loterana

iray izy ireo, ilay lohan'izany. Eny, dia hitantsika fa izany no fotoan'ny fikambanana. Zavatra mitovy ankehitriny, ny Kominisma sy ny rehetra dia mikambana miaraka; eran'izao tontolo izao, ary ny fiangonana sy ny sisa, dia mikambana miaraka.

⁷⁸ Diniho ny natiora. Oh, oadray! Ny natiora, raha handinika fotsiny ny natiora ianareo, dia manao an'ilay zavatra mitovy izany. Ny natiora no alimanakan'ny famantaran'Andriamanitra. Efa fantatrareo ve izany? Jesosy no niteny tamin'izy ireo mba handinika ny natiora. Hirohondrohona ny ranomasina, hitanareo, ary hisy zavatra maro samihafa, ary ireo horohorontany amin'ny toerana maro, adin'ny firenena, famantarana eny amin'ny lanitra, famantarana ety an-tany, na aiza na aiza dia hisy famantarana ny amin'ireo fotoana ho avy.

⁷⁹ Diniho ny rahona. Alohan'ny hitondran'ny rahona oram-baratra iray, dia fantatrareo ve ny mahatonga an'izany? Rahona kely maromaro no mitambatra, manao rahona anankiray lehibe. Eny, ity anankiray ity dia manana andian-drivotra kely mitsoka azy, ity anankiray hafa ity dia manana andian-drivotra kely mitsoka azy, ary izy rehetra dia miaraka mitsoka, ary amin'izay fotoana izay ianareo dia manana rivo-mahery iray. Hitanareo? Mikambana izy ireo alohan'ny hahazoan'izy ireo an'ilay oram-baratra; tsy maintsy mitambatra izy ireo.

⁸⁰ Diniho ireo ganagana sy gisa manakambana ny tenany miaraka alohan'ny hialan'izy ireo amin'ny fireneny. Hitanareo? Mitambatra miaraka izy ireo. Afaka mahita azy ireo ianareo manidina avy eto amin'ity dobo ity manketsy amin'itsy dobo itsy, avy eto manketsy, izy rehetra dia mitambatra. Mikambana izy ireo, miomana ho an'ny fiaingany. Hitanareo, izany fotsiny dia...izany no natiora, ary Andriamanitra no namorona ny natiora, ary ny natiora dia miasa araka ny drafitr'Andriamanitra. Lalàna iray izany, lalàn'Andriamanitra tsy voasoratra, io natiora io dia miasa araka ny Lalàny.

⁸¹ Toy ny hoe fotsiny, miresaka ao amin'ny fotoampandevenana iray, ny amin'ny *tsiron-kazo* izay midina ao am-pasana, any amin'ny faran'ny fakan'ilay hazo, mba handry ao mandra-pahatongan'ny fitsanganana amin'ny lohataona. Lalàn'Andriamanitra izany. Tsy misy fahalalana afaka manao an'io *tsiron-kazo* io handeha hidina ao; tsy afaka hisintona azy avy ao ianareo, tsy afaka hitery azy avy ao ianareo. Tsy misy fomba hanaovana an'izany tsaratsara kokoa noho ny fanaovan'Andriamanitra azy. Andriamanitra no manana ny fomba tanteraka. Noho izany rehefa mihintsana ny ravina, dia amin'izay fotoana izay Izy no mandefa an'ilay *tsiron-kazo* midina mankany am-pasana ary manafina azy. Araka ny nolazain'i Joba hoe, "Afeno ao am-pasana aho mandrapahalasan'ny Fahatezeranao." Hitanareo? Mandeha midina izany satria izany no lalàn'ny natiora, alohan'ny fanala. Jereo

ireo ravina ankehitriny izay manomboka mianjera. Nahoana? Izany no lalàn'ny natiora.

⁸² Ireo ganagana dia hikambana, ny tsirairay avy amin'izy ireo, ary mivory manodidina ny mpitarika iray. Eo no hahafantaran'izy ireo na izany aza, tsy fantatroe hoe ahoana no anaovan'izy ireo an'izany, fa fantatr'izy ireo fa io gana kely io dia mpitarika iray. Ary io vorona kely io, mikambana izy ireo ary mivory manodidina azy, ary miakatra avy hatrany eny amin'ny habakabaka. Ary izy dia...tsy niala teo amin'io dobo io mihitsy ankehitriny, fa handeha avy hatrany mihitsy kosa mankany Louisiana na Texas arak'izay azony aleha, ho ao amin'ilay tanimbarry. Hitanareo, alohan'ny handraisan'izy ireo ny fanidinany, handao ny tranony izay nahaterahan'izy ireo tamin'io taona io, dia mikambana miaraka izy ireo. Amena! Eo ianareo izao; mivory manodidina ny mpitarika azy ireo.

⁸³ Ny olana amin'izany dia, eo amin'ny olona, tsy mahafantatra ny mpitarika azy izy. Eny, tompoko. Hivory manodidina ny anaram-piangonana iray izy ireo, hivory manodidina ny eveka iray izy ireo na olona iray, fa tsy hivory manodidina an'ilay Mpitarika, ilay Fanahy Masina ao amin'ny Teny. Hitanareo? Hoy izy ireo hoe, “Oh, eny, matahotra aho sao ho lasa fanaticika kely iray aho; matahotra aho sao handeha amin'ny tongotra tsy izy aho.” Ohhhh, eo ianareo izao! Ahoana moa raha nilaza io ganagana kely io hoe, “Tsy tiako fotsiny ny fomba hikarakarany ny volony. Tsy mino aho hoe hanaraka azy aho.” Ho faty hivaingana ianareo. Ho tratra ao ianareo, raha tsy mandray ny—ny fanidinana rehefa mandeha izany. Manakambana ny tenany miaraka izy, ary ny natiora no manao an'izany.

⁸⁴ Ny gisa dia manakambana ny tenany miaraka, mampivory ny tenany manodidina ny mpitarika azy; manao an'ilay zavatra mitovy izy ireo.

⁸⁵ Efa mba voamarikareo ve ireo tantely mifindra fonenana? Manakambana ny tenany miaraka ireo tantely, mialohan'ny hifindrany toerana, manodidina ny mpanjakavaviny mihitsy. Marina izany. Ary rehefa mandeha izy, dia lasa koa izy ireo. Eny! Inona no ataon'izy ireo? Mikambana izy ireo alohan'ilay fifindrana toerana. Tena marina; ny natiora rehetra!

⁸⁶ Ny trondro dia mampikambana ny tenany miaraka alohan'ny fifindrana amin'ny lohataona. Ao anatin'ny ranomasimbe ao, dia afaka mahita azy ireo ianareo; ireo lehibe...ilay antsointsika hoe “be trafo,” trondro mena nofo. Rehefa tonga eo izy ireo, alohan'ny ahatongavan'io fifindrana io, dia hahita azy ireo aman'aliny ianareo, ao anatin'io ranomasina io, tonga manodidina sy manodidina; an'ilay rano masira, nefo dia trondron-dranomamy tokoa izy ireo. Ary indro izy ireo fa miakatra avy hatrany ao amin'io ranomamy io, miakatra ho an'ny fotoam-panatodizana. Miakatra eo izy ireo ary manatody,

isaky ny efa-taona eo ho eo, ary maty izy ireo vantany vao avy manatody. Ary fantany fa mandeha ao izy ireo mba ho faty, ary tsy misy na inona na inona azonareo hisakanana azy ireo. Hitsambikina amin'ireo fandri-trondro izy ireo sy ny zavatra hafa, miakatra eo, mahafantatra fa mandeha mankany amin'ny fahafatesany izy ireo. Saingy ny lalàn'ny natiora no mampanao azy ireo, hahafantatra fa miakatra eo izy ireo sy hanatody ao anatin'ny lavaka, ary ho faty. Ary tonga ireo tanora, ary misy zavatra anankiray mampikambana azy ireo miaraka amin'izay fotoana izay, ary mankao amin'ilay ranomasimbe izy ireo. Fikambanana izany! Lalàna iray izany. Tsy afaka miady amin'ny lalàn'Andriamanitra ianareo.

⁸⁷ Ireo firenena dia—dia rava, satria izao no fotoana izay hitantsika fa—fa izy ireo dia natao hanao an'izany. Ao amin'ny dingan'ny fikorontanam-pirenena no misy antsika. Hitantsika fa mandrava ny fisakaizana ireo firenena. Isan-taona, dia hitantsika *ity* firenena ity fa atelin'ny kominisma; *ity* anankiray ity atelin'ny kominisma. Ary eto amin'ny firenentsika manokana mihitsy aza, dia rotiky ny kominisma izy, ary izany no handresy! Hitanareo, hataony izany, tsy misy fomba hanakanana an'izany. Nahoana? Ilay antony izay tsy nahafahanareo nanakana an'i Titus ihany. Efa nandà an'Andriamanitra sy ny Teniny ny olona. Eny, tompoko, noho izany dia hanao an'izany izy ireo, ary hitantsika fa eo amin'ny dingana mihitsy izany.

⁸⁸ Izaho, matetika, izaho dia maka ora maromaro; efa eo amin'ny telopolo minitra sahady aho, izao ankehitriny izao. Hitanareo? Saingy mba hampidirana azy rehetra, dia manosika fotsiny aho. Ianaro izany rehefa tonga any an-trano ianareo.

⁸⁹ Mariho, mikambana mihitsy izy ireo ankehitriny. Hoy ianareo hoe, "Rahalahy Branham, marina ve izany?" Ho tonga eo amin'ny Adin'ny Aramagedona izy ireo; izany marina tokoa no hataon'izy ireo. Hitanareo? Ary mikambana ho an'izany mihitsy izy ireo izao ankehitriny izao. Izany no antony ananantsika ny U.N. sy ny sisa izay ananantsika. Ny Tany Tandrefana dia mikambana hanohitra ny Tany Tatsinanana, ny kominisma sy ny sisa, izy rehetra dia mikambana miaraka. Ireo fiangonana dia mikambana miaraka. Ny zavatra rehetra dia toy ny hoe mikambana. Mikambana, manakambana ny tenany miaraka, hitantsika izany.

⁹⁰ Izao koa, rehefa io fikambanan'ny firenena rehetra io, ireo famantarana ireo, ireo famantaram-pirenena, dia hitantsika eto amin'izao tontolo izao, ireo horohorontany any amin'ny toerana samy hafa, zavatra samihafa mikambana; manao an'izao tontolo izao hiaraka, manao ny olona hiaraka, ny fiangonana rehetra hiaraka, ireo zavatra rehetra ireo. Ary rehefa mandeha io fikambanana rehetra io, dia misy fikambanana hafa anankiray mandeha. Amena! Izany no tiako atoro anareeo ankehitriny.

⁹¹ Manakambana ny Ampakariny Andriamanitra. Ho tonga miaraka Izy, avy any Atsinanana sy Andrefana, ary ny Avaratra sy ny Atsimo. Misy fotoan'ny fikambanana iray, ary efa mandeha izany izao ankehitriny izao. Inona no Hikambanany? Ny Fampakarana. Amena! Eo am-panomanana Azy Andriamanitra. Eny tompoko, mikambana! Mikambana amin'ny inona Izy? Amin'ny Teny! “Fa ny lanitra sy ny tany ho levona, fa ny Teniko tsy ho levona mihitsy.” Manakambana ny Tenany Izy amin’ny HOY NY TOMPO HOE tsy mijery an’izay lazain’ny anaram-piagonana na ny olon-kafa. Manakambana ny Tenany Izy. Mivonona Izy. Nahoana? Izy no Ampakarina. Marina izany. Ary manakambana ny Tenany amin’ny Mpampakany Izy, hitanareo, ary ny Mpampakatra dia ny Teny. “Tamin’ny voalohany ny Teny, ary ny Teny tao amin’Andriamanitra, ary ny Teny dia Andriamanitra. Ary ny Teny dia tonga nofo ka nonina teo anivontsika.”

⁹² Ary ny Fiagonana sy ny Ampakarina ary ny Teny dia tena lasa iray, hany ka ilay tena Teny Izy tenany no manatanteraka an’ireo asan’ilay Mpampakatra. Amena! Hitanareo ve ilay izy? Fikambanana iray! Tsy misy intsony ny hoe, “Mikambàna amin’ny fiagonana”; tsy misy intsony an’ity, fa andosiro ny zavatra rehetra ary mifatora amin’i Jesosy Kristy. Hitanareo? Izany no fotoan’ny fikambanana. Andriamanitra, manakambana ny Ampakariny miaraka, mamerina Azy; tena marina tokoa. Manakambana ny Tenin’ny Fikasany.

⁹³ Tesaloniana Faharoa, toko faha-2; Izany no milaza, io toko faha-5 io dia milaza hoe, “Ireo masina izay nodimandry ao amin’ny vovoky ny tany dia hifoha. Ary avy eo isika dia hikambana amin’izy ireo (ireo velona, miaraka amin’ireo izay efa maty), hikambana mialohan’ny hiakarantsika Any mihitsy aza,” satria ny Ampakarina dia ho feno rehefa tonga Any Izy. Ireo izay velona, izay manakambana ny tenany amin’ny Teny, ary ireo izay efa lasa dia efa nanao an’izany; ary tonga miaraka Izy rehetra, manao fikambanana iray lehibe an’ny fikambanana alohan’ny hiakarana Any. Amena!

⁹⁴ Tsy maintsy mitsangana ny Kominisma, ireo zavatra hafa ireo dia tsy maintsy mitsangana, ary ny fiagonana dia tsy maintsy manakambana ny tenany any, rehefa ireo...ary ireo firenena any ho an’ny Fiombonamben’ny Fiagonana Manerantany; ary ny Ampakarina dia tsy maintsy manakambana ny Tenany eo ambanin’ny Tenin’Andriamanitra. Mba hanaovana an’izany, dia nandefa ny famantaran-Danitra sy ny sisa Andriamanitra, izay manaporofo amin’ilay Fiagonana, tahaka ny Nataony ho an’ny firenena. Amena.

⁹⁵ Andriamanitra; fotoan’ny fikambanana! Eny, tompoko. Oh, oadray! Ankehitriny, tsarovy ankehitriny, fa misy ny fikambanana iray an’ny Teny (miverina mikambana indray), mamerina “ny Finoana izay nomena indray mandeha ho an’ireo

masina." Mamerina! Mba hahatonga an'izany ho vita amin'izao andro izao. Ny fotoana tokana hahafahan'izany ho vita dia izao ankehitriny izao. Tsy mbola nenjehina mihitsy izany na taiza na taiza; nilentika tao amin'ireo fetin'anaram-piagonana izy ireo. Fa ankehitriny, dia tsy an'ny fetin'anaram-piagonana intsony izany, satria izany dia fotoan'ny fikambanana ho an'ireo lehilahy sy vehivavy avy amin'ny firazanana rehetra, ny loko rehetra, ny fanekem-pinoana rehetra, ny zavatra rehetra eo ambanin'i Kristy amin'ny alàlan'ny Batsian'ny Fanahy Masina ary miverina amin'ny Teny.

⁹⁶ Fotoan'ny fikambanana ho an'ilay Fiagonana! Oh, oadray! Fikambanan'ny Teny rehetra izay naparitak'ireo rafi-pandaminana lavitra: nanomboka tao Nise, Roma, rehefa nandrafitra an'ilay fiagonana voalohany izy ireo, ary nandrafitra an'i Luther izy ireo, nandrafitra an'i Wesley izy ireo, nandrafitra ny fiagonana sisa rehetra izy ireo. Ary teo am-panaovana an'izany, dia tsy maintsy nanangana fanekem-pinoana iray izy ireo, ary tamin'izay fotoana izay rehefa nandefa zavatra hafa Andriamanitra, dia tsy afaka nandray an'Izany izy ireo. Noho izany, dia tsy azo natao izany hatramin'izao. Ary Andriamanitra no nampanantena, amin'ny andro farany, fa "ny Finoan'ireo ray dia haverina indray amin'ilay Ampakarina," ho toy izany ilay izy, ary tsy ho fotoana iray hafa izany fa izao fotoana izao. Jereo hoe inona ny famantarana iray avy any An-danitra, tahaka ny Andry Afo iray mihantona eo anivontsika, ary miaraka amin'ireo famantarana sy fahagagana an'i Jesosy Kristy Tompo. Ary raha miresaka amintsika Izzy, dia tsy diso tamin'ny fisiany tanteraka hatrany amin'ny teboka Izany. Amena! Noho izany dia hitantsika hoe aiza no itsangantsika. Fotoan'ny fikambanana!

⁹⁷ Hitantsika ireo firenena fa mikambana, hitantsika izao tontolo izao fa mikambana, hitantsika ny kominisma fa mikambana, hitantsika ireo fiagonana fa mikambana; ary hitantsika Andriamanitra fa mampikambana ny Tenany amin'ny Ampakariny, hany ka lasa zavatra iray ihany Izzy sy ny Fiagonana. Haleloia! Tahaka an'ilay piramida tany. Marina! Manakambana ny tenany miaraka; Andriamanitra manakambana! Nahoana? Tsy nisy mihitsy tany aloha, hatramin'ny taonan'ny fiagonana voalohany, mba nisy Andry Afo iray teo anivon'ireo olona. Tsy nisy mihitsy tany aloha, hatramin'ny taonan'ny fiagonana voalohany, mba nahitan'izy ireo an'ireo zavatra izay hitantsika amin'izao andro izao. Ary izany dia natao ho azo atao fotsiny ihany rehefa nandefa an'ireo Tombokase Fito Andriamanitra ary nanome antsika ny famantarana iray tamin'ny alàlan'Izany, ka naniraka an'ireo Anjely fito nidina avy tany An-danitra; ary tonga mba hamerina indray an'ilay Teny neparitaka tao amin'ireo anaram-piagonana ireo, ary namatotra azy indray amin'ny Tenin'Andriamanitra, mba hampidina ny Fanahiny Masina.

⁹⁸ Hoy Jesosy hoe, “Raha mitoetra ato Amiko ianareo ary ny Teniko ao aminareo, dia angataho izay tianareo, fa hatao ho anareo izany.” Manakambana ny Ampakarina indray amin’ny Teny, izay Andriamanitra. Ilay Fiagonana sy ny Teny, tsy ny Fiagonana sy ny fanekem-pinoana, ny Fiagonana sy ny Teny; ny Ampakarina sy ny Teny no nikambana miaraka. Oh, oadray! Inona ny . . . Mamerina indray ny inona? Ny Finoana an’ireo ray pentekotista tany am-boalohany, hitanareo, izay nparitaky ny vondron’i Luther. Tsy Luther izy tenany; tsy Luther, tsy Wesley, tsy ireo mpanorina malaza ireo. Fa taorian’ny nahalasanan’izy ireo, dia nisy fiagonana iray nitsangana, ary izy ireo . . . inona no nataon’izy ireo niaraka tamin’izany tamin’io fotoana io, nanao rafi-pandaminana iray avy tamin’izany izy ireo. Nanaiky an’ireo fanekem-pinoana sy ny sisa izy ireo, ary nanalavitra izy ireo. Ary jereo izy ireo amin’izao andro izao, ankehitriny dia nuditra tao amin’ilay Fiombonamben’ny Fiagonana Manerantany izy ireo.

⁹⁹ Ankehitriny, hitanareo, fa amin’ny andro farany, hitanareo, dia mahita an’ireo zavatra mitranga isika ankehitriny izay tsy mbola nitranga mihitsy tany aloha. Hitanareo, famantaran’Andriamanitra anankiray izany, ary io fikambanana rehetra io dia famantarana ny fotoana. Ankehitriny, dia tstantsika ny hijery tsara an’izany ary ho tena manana antoka fa azontsika ilay izy. Mamela ny . . . navelan’izy ireo ilay Teny marina noho ireo anaram-piangonana; manaiky ny fanekem-pinoana sy ny hevit’ireo olona samihafa raha tokony handray ny Teny.

¹⁰⁰ Hoy Apokalypsy 10 hoe, “Ny Hafatr’ilay anjely fahafito.” Ankehitriny dia tsarovy, fa izany dia tena amin’ireo Trompetra Fito mihitsy, ary misy anjely fito izay mitsoka Trompetra Fito. Ho tonga eo amin’izany isika amin’ny manaraka. Fa tsarovy eo, tena voafaritra mihitsy no Nilazany hoe, “An’ny anjely . . . ,” tsy Trompetran’ilay anjely fahafito, fa ny “Hafatr’ilay anjely fahafito.” Hitanareo, tsy Trompetran’ilay anjely, ny Hafatr’ilay anjely! Hitanareo, ilay anjely dia nitsoka fotsiny ihany an’ilay trompetra, io anjely fahafito io, ny Trompetran’ilay anjely. Fa ity dia milaza hoe, “Amin’ny andron’ny Hafatry ny anjely fahafito,” hitanareo, rehefa tapitra ny Hafany. Hitanareo, izany no Hafatry ny taonan’ny fiagonana. Ao amin’ity fotoana ity, dia izy no . . . ny Hafatra, fa tsy ny Trompetra, ary “ny zavamiafin’Andriamanitra (izay voasoratra ao amin’ny Teny) dia tokony hifarana.”

¹⁰¹ Ankehitriny dia jereo hoe andro inona no iainantsika! Jereo ireo Tombokase ireo, ahoana no nananganan’izany an’ilay Tenin’Andriamanitra neparitaka, ny amin’i Luther sy ny sisa rehetra amin’izy ireo, ireo mpanavao malaza izay nivoaka ireo; niverina mihitsy ka nampiseho an’izany tao amin’ny Baiboly, hoe aiza no hisy azy ireo; ny olona tsirairay ao amin’ny toerany, inona

no hataony ary inona no hitranga amin'ilay fiangonana; inona no hataony, ary inona no hitranga amin'ilay fiangonana; ireo zavatra rehetra izay navelany ireo. Ary amin'izay fotoana izay, ao amin'ny andro farany, rehefa tsy nahafantatra na inona na inona nikasika an'izany isika, dia nolazaina mialoha tamintsika fa zavatra iray no hitranga; ary na dia ireo gazety sy ny sisa aza dia naka azy ireny, ary nidina avy hatrany ka nanambara an'ilay izy sy namatotra an'ireo zava-miafina niaraka. Amena! Rahalahy, ambony indrindra izany amiko! Izany, amiko, dia mametraka ny Teny amin'ny laharany. Tsy ahoako izay—izay... na ahoako izay lazain'ny olona, eritreretiny, marina izany, saingy ho ahy dia izany no Fahamarinana, mino an'izany aho.

¹⁰² Tahaka an'ireo magy, izay nidina avy tany Babylona, niantsoantso izy ireo hoe, "Aiza Izy, ilay teraka ho Mpanjakan'ny Jiosy? Eto an-tany Izy, izao ankehitriny izao. Tsy maintsy mahita Azy izahay." Marina izany. Ary izaho dia mino fa tena efa akaiky ho tonga Izy ka afaka miteny aho hoe, "Indro, tamy ny Mpampakatra! Reko ilay antson'ny mamatonalina!" Amena! Eo amin'ny fotoan'ny farany mihitsy isika izao. Oh, oadray, ilay ora izay iainantsika. Mariho. Hitanareo?

¹⁰³ Andro toy ny inona! Fotoana inona no iainantsika, hifarana ilay zava-miafina lehibe an'Andriamanitra; mitondra an'ilay Maha-Andriamanitra, maneho ny maha-izy Azy; ahoana ireo isma kely ireo, ary nandeha ka nanao Azy ho *ity*, ary ny olona iray nanao Azy ho *ity*, ary ny olona iray nanao Azy ho *itsy*. Fa nidina ilay Anjelin'ny Tompo ka naka an'ireo ismany rehetra, ary namoaka an'ilay Fahamarinana avy tao amin'izany, ka nampiseho an'Izany. Ary io ilay Izy, tanteraka mihitsy arak'izay mety maha-izy Azy, tsy misy lâlana hafa azonareo haleha. Io ilay Izy, izany no maha-izy Azy. Hitanareo, taranaky ny menarana, ireo—ireo zavatra samihafa rehetra izay tena zava-miafina tokoa teo anivon'ny olona. Hitanareo? Inona izany? Izy dia nanana... Famantaran'ny inona izany? Fikambanana!

¹⁰⁴ Inona no Nolaizainy ao amin'ny Malakia 4? Hamerina! Hamerina indray an'ilay Finoana pentekotista, hiverina amin'ny olona miaraka amin'ilay Hafatra pentekotista iray ihany, ilay famantara pentekotista iray ihany, ilay porofo pentekotista iray ihany, ilay Andriamanitra iray ihany, ilay Hery iray ihany, ilay fampianarana iray ihany, ny zavatra rehetra tanteraka mihitsy, miaraka amin'ny fanamarinan'ilay Andry Afo iray ihany izay nandona an'i Paoly teny amin'ny lâlana, nidina nankany Damaskosy; eo anivontsika amin'izao andro izao, manao an'ireo zavatra iray ihany izay Nataony tamin'izany andro izany. Fikambanana!

¹⁰⁵ Hitantsika ireo firenena fa mikambana, hitantsika izao tontolo izao fa mikambana, hitantsika ireo fiangonana fa mikambana. Hitantsika ilay Ampakarina fa mikambana, mikambana amin'ny Teny. Nahoana? Ny Teny dia

Andriamanitra. Ary tahaka ny Teny . . . Tahaka ny Mpampakatra (izay ny Teny), sy ny Ampakarina (izay mpandre ny Teny), izy ireo dia tonga miaraka ao amin'ny Fikambanana iray. Mikambana tahaka ny mariazy iray izy ireo. Hitanareo, vonona ho an'ny mariazy iray izy ireo, ary izy ireo—izy ireo dia lasa iray. Lasa ianareeo ilay Teny, lasa ny Teny ianareeo. Hoy Jesosy hoe, “Amin’izany andro izany dia ho fantatrareo izany. Ny maha-Ray rehetra, dia izany Aho; ary ny maha-izaho Ahy rehetra, dia ianareo izany; ary ny maha-anareo rehetra, dia Izaho izany. Amin’izany andro izany dia ho fantatrareo fa Izaho dia ao amin’ny Ray, ny Ray ato Amiko, Izaho ao aminareo, ary ianareo ato Amiko.” Hitanareo? Amin’ “izany andro izany.” Andro inona? Izao andro izao! Hitantsika ireo zavamiafin’Andriamanitra nafenina fa voambara. Oh, tena tiako izany!

¹⁰⁶ Oh, diniho hoe toy ny ahoana no tsy nahafahan’ny Teny sy ny siansa hifampitaha, tahaka ny ataony amin’izao andro izao. Tsy afaka nanao an’izany izy ireo tany aloha. Ankehitriny mihitsy vao afaka nanao an’izany izy ireo.

¹⁰⁷ Mariho, hoy Izy hoe, “famantaran-danitra, famantaran-danitra.” Ny siansa, sy ireo famantaram-pirenena; ankehitriny dia manana famantarana lehibe izy ireo eny amin’ny lanitra amin’izao andro izao, manana sambon-danitra sy ny sisa izy ireo. Saingy inona no ataon’ireny sambon-danitra ireny ho an’ilay tontolon’ny siansa? Mitondra tahotra ho azy ireo izany. Tsy fantatr’izy ireo hoe fotoana inona no hahafahan’izy ireo mandefa zavatra tahaka an’izany ka hampianjera mihitsy an’ireo baomba ireo, ka tsy hisy intsony isika. Hitanareo? Ankehitriny dia izany ireo famantarana izay ananan’izy ireo, fampisehoana mampahatahotra eny amin’ny lanitra. Hitanareo? Manana an’ireo izy ireo, bala afomanga atomika sy ny sisa, karazana famantarana rehetra.

¹⁰⁸ Hitanareo hoe taiza no nanasoniavan’izy ireo an’ilay—ilay fifanarahana, indray andro, hoe tsy hanapoaka baomba intsony mihitsy izy ireo any ambony any, fa ankehitriny dia handeha hidina any anaty rano izy ireo ary any ambanin’ny tany, hitsapa azy ireo fotsiny tahaka an’izany. Hitanareo? Manasonia fifanekena iray izy ireo hoe, “Tsy hanao an’izany izahay, raha milaza ianareeo fa tsy hanao an’izany (fa hiverina hody izahay ka hanao an’ilay izy tahaka an’izao; raha fantatray fa hanao tahaka an’izany koa ianareo any).” Hitanareo? Tsy misy na inona na inona mihitsy, izany fotsiny dia . . . tsy misy fahatokiana eo anivon’izy ireo, tsy misy na—tsy misy na inona na inona. Ianareo dia afaka . . . Hitanareo? Ary ny tsirairay dia matahotra an’ilay anankiray hafa. Izany no famantarana iray mampahatahotra.

¹⁰⁹ Ny siansa sy ny olona ary ireo firenena dia namokatra famantarana mampahatahotra iray eny amin’ny lanitra. Tena marina tanteraka izany. Ankehitriny, mifampahatahotra.

Ary nisy famantaran-danitra iray nomena ny... Hitanareo ankehitriny, izy ireo dia manana famantarana iray ihany koa eny amin'ny lanitra, famantarana mampahatahotra iray, lehilahy iray ao anatin'ny sambon-danitra; mety manana bala afomanga atomika iray, ary afaka mandatsaka ka manapotika ny firenena manontolo. Miditra ao amin'ny sambon-danitra iray, ary mitsangana eo. Tsy misy na inona na inona misakana azy ireo tsy hanao an'izany. Azo antoka fa ho vitan'izy ireo izany, izy ireo... amin'ny fotoana rehetra izay tian'izy ireo. Vitan'izy ireo ny hanao azy ho vovoka raha tian'izy ireo izany, saingy... ao anatin'ny dimy ambin'ny folo minitra manomboka izao. Ary izay azon'ny anankiray atao, dia ataon'ilay anankiray hafa tahaka an'izany, ihany koa. Noho izany, hitanareo fa manana famantarana iray izy ireo, saingy io karazana famantarana io dia mampitahotra azy ireo.

¹¹⁰ Mikambana miaraka izy ireo, mametraka ny heriny miaraka. Izao tontolo izao afaka, dia apetراك'izy ireo ny heriny. Ny kominisma dia mametraka ny heriny miaraka amin'i Rosia. Ny olona rehetra; saingy ny tsirairay dia mifampitahotra. Hitanareo, izany no famantarana iray mampahatahotra. Marina izany. Izany no famantaram-pirenena, sy ny sisa.

¹¹¹ Fa ilay Fiagonana kosa dia nahazo Famantaran-Danitra iray: Sambon-danitra iray! Amena! Jesosy Kristy, ao amin'ny endrika Andry Afo iray; izany Izy tao amin'ny Testamenta Taloha, izany Izy rehefa nihaona tamin'i Saoly teny amin'ny lâlana ho any Damaskosy Izy, ilay Jesosy iray ihany no eto amin'izao andro izao! Ary inona no ataon'Izany? Mitondra tahotra ve Izany? Mitondra fitiavana Izany, fikambanana iray amin'ny hafa. Amena! Fihetseham-po iray ho an'ny hafa. Mitondra ny Fitiavan'Andriamanitra Izany, oh, mampikambana antsika ary mitondra antsika, ilay Vatan'i Kristy, ao amin'ny fikambanana iray amin'ny maha-Ampakarina iray. Izany no ataon'izany ankehitriny, io fikambanana lehibe io izay Andriamanitra...

¹¹² Manakambana ny tenany izy ireo, ny vondrona anankiray *eto* mba hiady amin'ilay anankiray hafa, vondrona anankiray *eto* mba hiady amin'ilay anankiray hafa. Eto ilay fiagonana no mitsangana eo anelanelan'izy ireo; diniho izay mitranga, hikambana amin'izy ireo izany. Tena marina izany. Fa, ankehitriny, dia hitantsika fa izany dia mitondra tahotra sy korontana.

¹¹³ Fa ilay Fiagonana kosa, ilay Ampakarina, dia mikambana amin'Andriamanitra anankiray, eo ambanin'ny Fanahy iray, ny Fanahin'Andriamanitra, ao amin'ny Fikambanan'Andriamanitra masina iray, mba ho Ampakarina masina iray ho an'Andriamanitra. Marina izany, ny rehetra miaraka; fikambanan'ilay Vatana. Ilay Vatana dia miandry amin'ny maha-Ampakarina iray; amin'ny maha—amin'ny

maha-Ampakarina azy, satria isika dia miantso ny tenantsika hoe Ampakarina. Ho an'ny fotoan'ny famantarana an'ny Ampakarina, dia tena ho tonga miaraka ilay Fiagonana. Hamorona fitiavana iray eo anivontsika mihitsy izany, ka ho sarotra amintsika ny hifanalavitra. Marina izany. Isika fotsiny...tsy mila miangavy ny olona hivavaka ianareo, tsy mila miangavy azy ireo hanompo an'Andriamanitra ianareo, tsy mila miangavy azy ireo hanao an'izay marina ianareo. Tena tia Azy loatra izy ireo, hany ka tsy misy na inona na inona hafa.

¹¹⁴ Ahoana ny hevitrareo mikasika ny zazavavy kely iray, tena tovovavy kely tsara iray, izay hanambady tovolahy iray tsara tarehy izay tena tiany loatra, midika zavatra lehibe noho ny fiainany manokana izany, ary fantany avy hatrany fa hivady izy ireo. Arakaraky ny hanatonan'io andron'ny fanambadiana io, io zazavavy kely io, lazaiko anareo, fa izy dia tena "handeha hihodinkodina." Hitanareo? Hanao ny zavatra rehetra ho vonona fotsiny izy; manolo-tena tanteraka ho azy izy. Marina izany. Ny zavatra rehetra izay mahafaly azy, dia izany mihitsy no tiany hatao. Eny, izany no tokony ho fomban'ilay Fiagonana amin'izao andro izao, izany no tokony hiafenan'ny fiainantsika ao amin'Andriamanitra amin'ny alàlan'i Kristy, vita tombokase ao amin'ny alàlan'ny Fanahy Masina.

¹¹⁵ Ny zavatra izay nampianariko anareo teto, no milaza aminareo an'ireo famantarana sy ireo zavatra samihafa izay mitranga, tsy manana fotoana hanaovana an'ilay izy aho ankehitriny; hatao ao amin'ny hafatra hafa iray, raha sitrakny Tompo. Fa mbola misy zavatra kely anankiray banga ao amin'ilay Fiagonana. Ary tiantsika izany, ny ho tonga eo amin'izany, ary eo am-panaovana an'izany aho ankehitriny. Hitanareo? Tiantsika ny ho tonga eo amin'izany, raha...tsy maintsy hataonareo izany. Raha tsy manao an'izany ianareo, dia izany ihany, tsy maintsy hataonareo izany. Fa jereo, antomotra ilay fotoan'ny fikambanana, satria eo am-panangonana an'ilay Fiagonana Andriamanitra mba hisian'ny—ny Fampakarana mba handehanana any amin'ny mariazy ho an'ilay Fikambanana Lehibe: rehefa hikambana Mandrakizay Andriamanitra sy ny olona, rehefa hikambana amin'ny Mandrakizay ireo zava-boaharin'ny fotoana.

¹¹⁶ Efa natao indray mandeha izany tao amin'ny endriky ny Zanak'olona teto an-tany. Ary tsy maintsy nanolotra ny Ainy Izy mba hitondra hery iray, hampikambana olona hafa amin'io Hery iray io ihany, ho an'ilay Ampakarin'i Jesosy Kristy. Ary ankehitriny ilay Fiagonana dia manakambana ny Tenany amin'ny Vatan'i Kristy. Nanafaka ny Tenany Izy, nanala ny rojon-gadra kely rehetra, nanao ny Tenany ho vonona; miangona, fikambanana iray eo anivon'izy ireo; oh, ny fitiavana sy fifaliana, ary ny Fanahy Masina no mihetsika eo anivon'izy ireo. Oh, oadray, fotoana iray toy ny inona!

¹¹⁷ Tahaka ny ahitantsika an'ireo ganagana izay niomana, hitantsika ireo gisa izay niomana, hitantsika ny bibidia... ireo tantely izay niomana, hitantsika ireo rahona izay niomana ho an'ny orana, hitantsika ny zavatra rehetra; toy ny ahoana no hanakambanany ny tenany, ho an'ny fanosehany lehibe. Hitantsika ilay Fivondronan'ny Firenena, an'ireo firenena miaraka, manakambana ny tenany ao amin'ny kominisma. Hitantsika izy ireo fa manakambana ny tenany eto ao amin'ilay Tany Tandrefana. Hitantsika ny fiangonana fa manakambana ny tenany miaraka, ireo hafa rehetra ireo. Noho izany dia tena tsy azo atao, tsy misy fotoana afaka hitovy amin'izao; tsy nisy afaka nitovy amin'izao tamin'ny roapolo taona lasa, tsy afaka nitovy amin'izao. Tsy nisy afaka nitovy amin'izao tamin'ny folo taona lasa, tsy maintsy izao ankehitriny izao izany. Hitanareo, satria ireo isma sy ny sisa ireo dia tsy maintsy tonga eo amin'ity toerana ity.

¹¹⁸ Mifohaza ankehitriny! Ahetseho ny tenanareo, haingana mihitsy, ary jereo eto hoe aiza no misy antsika izao! Aiza no misy antsika? Tahaka an'ireo magy, ao amin'ny filaharan'ny Teniny mihitsy isika, ary ny Hazavan'ny Tompo no mamiratra eo amin'ny lâlantsika. Voninahitra ho an'Andriamanitra ilay Avo indrindra. Ary Voninahitra ho an'Andriamanitra Izay nanome antsika an'i Jesosy Kristy, Izay tiantsika, ka nitondra antsika teto amin'ity toerana ity. Ary satria isika... Isika no Olony, novidiana tamin'ny vidin'ny Râny.

¹¹⁹ Oh, oadray! Rehefa tonga ny fotoan'ny fikambanana, dia mijery isika, raha mikambana amin'ny hafa isika ao amin'ny famatoran'ny Fanahiny, isika... Mety ho ny Fanahiny ve izany? Azo antoka, ny Fanahiny Izany. Nahoana no Izany? Ny Teniny Izany, ary Izy no...izany no Fanahin'ny Teny. Ary rehefa tonga eo aminareo io Fanahin'ny Fampanantenana io ka manamarina sy maneho ny Tenany eto mihitsy, dia ilay Fanahy iray ihany ve Izany? Izany ilay Tokana izay nomba an'i Mosesy tao anefitra! Izany ilay Tokana izay teo amin'i Jesosy Kristy! Izy ilay Tokana izay nihaona tamin'i Saoly teo amin'ny lâlany nankany Damaskosy! Izy no tsy miova omaly, anio, ary mandrakizay! Ary manao an'ilay zavatra mitovy Izy!

¹²⁰ Ary hitantsika ireo firenena miaraka, hitantsika ireo lohan'ny fiangonana miaraka, hitantsika ny kominisma miaraka, hitantsika ireo isma fa mikambana, hitantsika ireo zavatra rehetra ireo; ary ankehitriny dia hitantsika ilay Ampakarina fa mikambana amin'ny Teny. Oh, oadray! Izany no fotoana izay hitsanganan'ireo masina mba hikambana amin'ireo izay velona, mba handeha ary hikambana amin'i Jesosy Kristy Mandrakizay.

¹²¹ Enga anie Andriamanitra hanampy antsika, ny tsirairay avy, mba hikambana amin'i Kristy izao hariva izao, hahafoy ny zavatra rehetra izay maha-izy antsika isika, ny zavatra

rehetra izay ananantsika, ny fanahintsika manontolo, vatana, ary saina, ho an'i Jesosy Kristy, ka hiandry an'ilay fotoan'io fikambanana io.

Rehefa haneno ny trompetran'Andriamanitra, ka
tsy hisy andro intsony,
Ary hiposaka Mandrakizay ilay maraina,
mamiratra sy manjopiaka;
Rehefa hitsangana ny maty ao amin'i Kristy
ka hiangona eo amin'ilay morona hafa any
(miaraka amin'ilay Ampakarina izay velona),
mba hakarina miaraka.

¹²² Jereo ilay fikambanana! Andriamanitra manakambana an'ilay Fiagonana amin'ny Teniny, ny Teny amin'ilay Fiagonana, mba hahatonga azy roa ho iray ihany, "Lazao *izao*, dia hitranga izany. Ataovy *izao*, dia hitranga izany. Izay ilay izy; izany dia Izaho eo alohanao, izany dia Izaho izay manaporofo an'ilay izy; izany dia Izaho izay momba anao." Eny àry.

¹²³ Hitantsika ankehitriny fa tonga ilay fotoana rehefa maneno ny Trompetra, ary ireo masina izay natory tany aoriana tany, dia tsy mety ho tanteraka raha tsy misy antsika; miankina amintsika izy ireo (Hebreo 11); ary rehefa tonga miaraka izy ireo, dia mikambana amin'ireo izay velona izy ireo. Ilay Fiagonana dia mikambana amin'ny Teny, avy eo ilay Fiagonana sy ny Teny dia mikambana miaraka, tonga iray. Ireo masina izay maty miaraka amin'ireo masina izay velona dia mikambana miaraka mba ho iray; ary izy rehetra dia handeha miaraka mba hikambana amin'i Kristy any, ho an'ilay Sakafon'ny Mpanambady an'ny Zanak'ondry.

¹²⁴ Fotoan'ny fikambanana izany, ary manidina eny rehetra eny ireo famantarana. Ao amin'ny firenena ireo famantarana, ao amin'ny kominisma ireo famantarana, ireo famantarana ao amin'ny Tany Tandrefana, ireo famantarana ao amin'ny Fiombonamben'ny Fiagonana. Ary eto ilay Famantarana *izao* hariva *izao* eo ambanin'ny fiarovan'ny Fanahy Masina, ary ny Tenin'Andriamanitra no manamarina an'izany ary manao an'izany ho ny Fahamarinana. Amena! Fotoan'ny fikambanana! Ny famantarana ny Fotoan'ny Fikambanana!

Ndao isika hanondrika ny lohantsika.

¹²⁵ Tompo Jesosy, raha mitroatram-pifaliana ny foko mahantra, raha mahita an'ireo fahafahana, (ho ahy izay lehilahy efa azontaona), kanefa ireo fahafahana amiko izay mahita Anao tonga ato amin'ity taranaka ity; ny velona ka mijoro eto, ary mahita rehefa maneno io Trompetra io hoe, "Izay maloto, dia mbola hihaloto. Izay marina, dia mbola hihamarina. Izay masina, dia mbola hihamasina." O Tompo Andriamanitra!

¹²⁶ Ary ny mieritreritra anay izay mitsangana, ao anatin'ny fotoana iray, ao anatin'ny indray mipi-maso, rehefa tsy

hahafantatra an'izay miseho izao tontolo izao, fa tampoka, dia ho hitanareo hiseho eo anatrehanareo, ireo malalanareo izay efa lasana, ho tonga hikambana aminareo indray. Ary hovàna ao anatin'ny fotoana iray izahay, ao anatin'ny indray mipimaso; ary hakarina, miaraka, mba hitsena ny Tomponay eny amin'ny habakabaka. Ary avy eo dia hikambana Aminy, mba ho any mandrakizay, ary tsy hiala eo amin'ny Fanatrehany intsony indray.

¹²⁷ Zavatra lehibe toy ny ahoana izany amin'izao andro izao, Tompo, ny mahafantatra fa mikambana ho Fanahy iray izahay ankehitriny. Fanahy iray, ny Fanahy Masina, izay manana ny Teny eo amin'ny Fifehezany, no tonga ao aminay. Ary zavatra lehibe toy ny inona izany, tombontsoa toy ny inona ny miendaka amin'izao tontolo izao rehetra, mba hanakambana ny tenanay amin'i Jesosy Kristy. Ary ny mieritreritra fa indray andro any, ao amin'ny endrika ara-batana, miaraka amin'ny vatana iray tahaka ny Vatany manokana be voninahitra, dia hipetraka eo amin'ny latabatra izahay ao amin'ilay Sakafon'ny Mpanambady ary eo izahay no hikambana ary hivady Aminy ao amin'ny mariazy; mba hiaina ho toy ny Ampakarina sy Mpampakatra mandritry ny andro rehetra izay ho avy, mandritry ny Mandrakizay tsy manam-pahataperana.

¹²⁸ Tompo Andriamanitra, enga anie izao tsy ho fisainana anganongano fotsiny ho an'ny olona, fa enga anie izany ho lasa tena zava-misy iray ka ho hanoanana sy hetaheta no hitoetra ao amin'ny olona ka izy ireo dia... hamaky ny gazetiny, mijery eo amin'ny... mihaino ny radio sy ny vaovao, ary mahita fa izany no fotoan'ny fikambanana. Mipipiaka ireo famantarana.

¹²⁹ Tompo Andriamanitra, tahaka ny niresahanay an'ireo vehivavy, hoe inona no hataon'izy ireo amin'ny andro farany; inona no hataon'ny fiangonana amin'ny fitambarana farany; ary ho inona ireo Taonan'ny Fianganana, ary ho inona ireo Tombokase, ireo zavatra hafa rehetra ireo. Ary hitanay fa izany dia, tahaka ny tamin'ny andron'i Noa. Hitanay fa izany dia, tahaka ny tamin'ny andron'i Sodoma sy Lota, rehefa nampahafantatra ny Tenany tao anatin'nynofon'olombelona ilay Anjelin'Andriamanitra, izay nihinana nofon-ombivavy sy nisotro an'ilay ronono avy tao amin'ny ombivavy, ary nihinana mofo; sy nitsangana teo ka afaka niteny an'izay niseho Taoriany. Ary Jesosy no nilaza fa izany zavatra izany ihany no hiseho amin'ny fihavian'ny Zanak'olona.

¹³⁰ Tompo Andriamanitra, efa hitanay ilay piramida, toy ny ahoana no nanorenanay azy tany, ary efa hitanay hoe ahoana no nanampianay an'ireo zavatra ireo teo amin'izany; ary hitanay fa ao amin'ny andro farany izahay izao, miandry an'ilay Lohan'ny Vatofehizoro. Voninahitra ho an'Andriamanitra! Mivavaka izahay, Ray, mba Hamohazanao ny olona, haingana ankehitriny,

ka hiangona miaraka, amin'ny fitiavana masina sy fanajana an'i Jesosy Kristy ary ho an'ny hafa.

¹³¹ Raha misy eto izao hariva izao izay tsy manana an'izany fanantenana izany mitoetra ao anatinareo, hanangana ny tānanareo amin'Andriamanitra ve ianareo ka hanao hoe, "Tompo Andriamanitra, akambano Aminao aho, akambano Aminao aho"? Andriamanitra hitahy anao, rahalahy. Andriamanitra hitahy anao, ary ianao, ianao; eny. "Akambano Aminao aho, Tompo." Eny! Oh, oadray!

Rava ireo firenena, mifoha Isiraely,

¹³² Jereo Isiraely any, mikambana miaraka. Isiraely, avy tany amin'izao tontolo rehetra izao, dia tsy maintsy nanakambana ny tenany; manakambana ny tenany ary ankehitriny dia firenena iray izy ireo. Firenena mikambana iray izy ireo: miaraka amin'ny sainany manokana, ny volany manokana, ny tafiny manokana, ny zavatra rehetra; raha tsy izany izy ireo tamin'izany, dia izany izy ireo ankehitriny. Isiraely mikambana, i Roma dia mikambana, ny fiangonana dia mikambana. Ary ny Ampakarina dia mikambana, amena; ary ny fihavian'ilay Fikambanana Lehibe. Inona izany? Izany dia ny rehetra mifindra mankany amin'ilay Famantarana, ilay Famantarana lehibe indrindra, Jesosy sy ny Ampakariny mikambana ho iray.

¹³³ Ray, Andriamanitra, ekeo ireto fitahiana izay angatahako ho an'ireto olona ireto, ary enga anie izahay hikambana Aminao ao amin'ny fo sy fanahy, raha manangana ny tānany izy ireo, maniry an'izany. Tompo Andriamanitra, diovy izahay ary ataovy ho Anao izahay; ekeo izany, Tompo. Izay ihany no fantatray sy azonay atao, dia ny mangataka. Ary dia Ianao no nilaza fa raha mangataka an'izany izahay ka nino an'izany, dia ho azonay izany; miandry an'izany aho, Tompo. Misaotra Anao aho amin'ny Anaran'i Jesosy Kristy. Amena.

Tiako Izy, tiako Izy,
Satria nitia ahy mialoha Izy,
Ka nividy ny famonjeko
Teo amin'ny hazon'i Kalvary. (Amena. Oh,
oadray!)

Indro, tamy ny Mpampakatra!
Reko ilay antson'ny mamatonalina!
Hiakatra isika miaraka amin'ny antsoantso iray,
raha mihazona isika rehetra,
Ary hitsena Azy eny amin'ny lanitra.
Miambena ka mivavaha, rahalahiko,
Fandrao misy olona maka ny satroboninahitrapo,
Fa ny matimaty sy mpiverin-dàlana
Dia tsy hanao ny akanjon'ny mariazy.

¹³⁴ Marina izany. Ndao isika hiomana ho an'io antson'ny mamatonalina io. Ho tonga amin'ny ora izay tsy eritreretinareo

izany. Hisy antso iray, tsy eo anivon'izao tontolo izao izay tsy mino; ho tsiambaratelo iray izany. Fa ireo mpino kosa, izay miandry an'izany, dia hitanareo ve ireo kintana tonga ao amin'ny filaharana? Hitanareo? Inona no novokarin'izany? Tena tahaka an'izay nataony tamin'ny voalohany mihitsy. Hitanareo, eo isika izao, tonga ireo famantarana.

Hitantsika fa miseho ireo famantaran'ny
Fihaviany voatahy,
He, indro ireo ravin'aviavy fa lasa maitso
ankehitriny;
Efa lasa any amin'ny firenena rehetra ny
filazantsaran'ny fanjakana;
Ary akaiky isika, mety ho hita ilay farany.

Amin'izay fotoana izay am-pifaliana, any lavitra
any, no hampandrenesantsika ny Hafatry ny
Fisehoany voatahy,

¹³⁵ Marina ve izany? Oh, ampandreneso ilay Hafatry ny Fisehoany voatahy! Izany no tsy maintsy hataontsika. Ilazao ny olona rehetra, "Mivonònà, miomàna hihaona amin'Andriamanitra." Amena! Tiako Izy. Oh, toy ny ahoana no itiavako Azy. Ankehitriny, ndao isika hitsangana ankehitriny. Raha mifampiarahaba isika, atsory ary raiso ny tânán'ny olona, ka mananova hoe:

Mandra-pihaonantsika! (mifandraisa tânana,
ankehitriny)... mandra-pihaonantsika!
Mandra-pihaonantsika eo an-tongotr'i Jesosy;
Mandra-pihaonantsika!...

Tsarovy, mety hahazo antso iray ianareo. Ny fihaonantsika manaraka dia mety ho eo an-Tongony.

O Andriamanitra anie homba anao mandra-
pihaonantsika indray!

¹³⁶ Ankehitriny, eritrereto fotsiny, mialohan'ny hihaonantsika indray; mialohan'ny hihaonantsika amin'ny Alahady maraina, na Alarobia hariva, ilay izy dia mety ho... ny zavatra voalohany fantatrareo, dia hisy olona tsy hita. Ity anankiray ity tsy ho hita, ary lasa izy ireo. Oh, ny mieritreritra ny vadinareo lahy tsy ho hita, na ny vadinareo vavy tsy ho hita, ary—ary ny vadin'i John tsy ho hita, ary—ary—ary eto ireo ankizy tsy ho hita. Mitranga ny zavatra rehetra (inona no niseho?), amin'izay fotoana izay dia tavela any aorianana ianareo!

Oh, tomany sy fidradradadrana toy ny inona
rehefa nilazana ny anjarany ireo very,
Niantsoantso teo amin'ny vatolampy sy ny
tendrombohitra izy ireo, (Tahaka an'i Israely,

niverina nankao an-tanàna, nankao amin'ilay
 Tempoly.)
 Nivavaka izy ireo nefá tara loatra ny vavak'izy
 ireo. (Nandà ny Hafatra izy ireo.)

¹³⁷ Oh, rahalahy, aza manao an'izany mihitsy. Na inona na
 inona ataonareo, mijanòna mahatoky eo amin'ilay antony! Eny,
 tompoko!

¹³⁸ Ankehitriny, mandrapihaonantsika, dia izao no hataontsika:

Raiso eo amino ny Anaran'i Jesosy,
 Ho ampinga amin'ny ahiahy rehetra;
 Rehefa miangona manodidina anao ireo fakam-
 panahy, (Inona no ataonao?)
 Bitsiho am-bavaka io Anarana masina io.
 Anarana sarobidy, O tena mamy!
 Fanantenan'ny tany sy fifalian'ny Lanitra;
 Anarana sarobidy, O tena mamy!
 Fanantenan'ny tany sy fifalian'ny Lanitra.

¹³⁹ Ndao isika hanondrika ny lohantsika ankehitriny, raha
 misamonomonona isika.

Amin'ny Anaran'i Jesosy no iondrehana,
 Miankohoka eo an-Tongony,
 Mpanjakan'ny mpanjaka any an-Danitra . . .
 satroboninahitra Izzy,
 Rehefa mifarana ny diantsika. (Hisy izany, indray
 andro any.)
 O Anarana sarobidy, Anarana sarobidy, O tena
 mamy!

Mandra-pihaonantsika indray, homba anareo anie
 Andriamanitra.

Fananantenan'ny tany sy fifalian'ny Lanitra;
 Anarana sarobidy, O tena mamy! Tena mamy!
 Fanantenan'ny tany sy fifalian'ny Lanitra.



NY FOTOAN'NY FIKAMBANANA SY NY FAMANTARANA MAG63-0818
(The Uniting Time And Sign)

Ity Hafatr'i Rahalahy William Marrion Branham ity, izay notoriana tamin'ny teny Anglisy ny Alahady maraina, 18 Aogositra, 1963, tao amin'ny Branham Tabernacle ao Jeffersonville, Indiana, U.S.A., dia nalaina avy tamin'ny horonam-peo ary natonta manontolo amin'ny Teny Anglisy. Ity fandikana amin'ny Teny Malagasy ity dia natonta sy nozarin'ny Voice Of God Recordings.

MALAGASY

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org